

# YAWHAN A LAIKA

# YAWHAN A LAIKA

## I

Shawng ningpawt ē Mungga nga ai; dai Mungga gaw Kārai Kāsang hte rau rai nga ai rai nna, dai Mungga nan Kārai Kāsang rai nga ai.

2 Dai Mungga gaw shawng ningpawt ē Kārai Kāsang hte rau rai nga ai.

3 Arai yawng māyawng gaw shi a mārang ē tai nga ai; nga mānga hta shi n lawm ai tai wa ai gaw, lāngai mi muk n nga ai.

4 Shi hita asak dāju rai nga ai; dai asak gaw māsha ni a nhtoi rai nga ai.

5 Dai nhtoi gaw nsin hta htoi nga ai rai nna, nsin māhtang gaw dai hpe n chyē hkap la wu ai.

6 Kārai Kāsang ē shangun dat ai, Yawhan mying ai wa lāngai mi, du sa ai:

7 Dai wa gaw, dai nhtoi a lam sakse hkam ya nna, yawng māyawng shi a jaw ē kam sham mu ga nga, sakse sa tai na mātu, du sa ai.

8 Dai wa gaw dai nhtoi n rai; dai nhtoi a lam sakse hkam ya na she, du sa ai.

9 Mungkan ga de sa nga let, māsha nlang htē hpe jáhtoi ya ai nhtoi mājing chyawm gaw, nga nga sai.

10 Shi gaw mungkan ga ē nga nga ai hte, mungkan ga mung shi a marang ē nan tai wa sai: rai ti mung mungkan ga gaw shi hpe n chyē wu ai.

11 Shi gaw shi a mung ga de du sa ra ai rai ti mung, shi a baw sang ni gaw shi hpe n hkap la ma ai.

12 Shi a amying ningsang hpe kam sham ai ni ngu ai, shi ē hkap la māla ni hpe Kārai Kāsang a kāshu kāsha tai lu na ahkang shi jaw mu ai:

13 Dai ni gaw, asai hte shāprat ai ni n rai, hkum shan a myit hte mung n rai, māsha a myit maw ai hku hte mung n rai, Kārai Kāsang ē shāprat ai ni she rai ma ai:

14 Dai Mungga gaw māsha a hkum shan dāgraw la nna, chyēju hte teng man ai hpring let, anhtē hta nga nga yu sai rai nna, Kāwa hta na Kāsha shingtai a hpung shingkang zawn, anhtē shi a hpung shingkang hpe, mu lu sā gaw ai.

15 Shi a lam Yawhan sakse hkan ya nna jāhtau tsun wu ai gaw, Nyē a hpang ē du sa ai wa gaw, nyē a shawng na wa rai nga ai mājaw, nyē a shawng ē rai nga sai, ngu nna ngai tsun ai wa gaw, ndai wa rai nga ai, nga ai.

16 Kāning rai nme law, anhtē mahkra gaw, shi a hkum tsup ai hta na, chyēju htap mi hta htap mi, lu la sa ga ai.

17 Jep ai tāra gaw Mawshe a lāta hte jaw da ai, rai nga ai; chyēju hte teng man ai lam gaw, Yēsu Hkristu a mārang ē tai wa ai, rai nga ai.

18 Kārai Kāsang hpe gāde ai muk gālo mung n mu yu ai; Kāwa a lāhpyen ē rawng nga ai Kāsha shingtai gaw, Kārai Wa a hkum shādan dan nu ai.

19 Yuda māsha ni gaw Yerusalem māre na, hkinjawng hte Lewi māsha ni hpe Yawhan hpang de shāngun dat nna,

Nang gaw kădai rai nga n ta? ngu nna san shăngun mu yang, shi hkam ai sakse lam gaw, da ndai rai nga ai:

20 Shi gaw, Ngai Hkrustu n rai nngai, nga nna n ip n nyet ai sha, yin la wu ai.

21 Shăloï shanhtē gaw, Dai rai yang gaw, nang Elia rai n ni? ngu nna san mu yang, shi gaw N rai nngai, ngu wu ai: Dai myihtoi rai n ni? ngu nna bai san mu yang, N rai nngai, ngu nna bai htan wu ai.

22 Dai rai nna shanhtē gaw, Anhtē hpe shăngun dat ai ni e wa tsun dan na ga lu n ga. Nang gaw kădai rai nga n ta? Na a hkum hpe nang kăning ngu n ta? ngu nna shi hpe bai san mu yang, Yawhan gaw,

23 Ngai gaw, myihtoi. Esaia htawn tsun ai hte măren, Dai Mădu a lam shăding mu, nga nna nam ē jăhtau ai wa a nsen rai nga nngai, ngu mu ai.

24 Dai shăngun kăsa ni chyawm gaw, Hparishe ni kaw na rai ma ai.

25 Bai shanhtē gaw, Nang gaw, Hkrustu mung n rai, Elia mung n rai, dai myihtoi wa mung n rai n yang gaw, nang hpa rai baptisma jaw n ta? ngu nna shi hpe san mu yang,

26 Yawhan gaw, Ngai gaw hka hta baptisma jaw nngai; nanhtē a kăang ē, nanhtē n chyē ai wa lăngai mi tsap nga ai:

27 Dai wa gaw nyē a hpang ē du sa ai wa rai nga ai; shi a kyepdin sumri pyi ngai n raw ging nngai, ngu nna shanhtē hpe htan mu ai.

28 Ndai lam ni gaw, Yawhan baptisma jaw let nga nga ai, Yawdan hka wora hkran na Behtani kăhtawng ē byin ai, rai nga ai.

29 Hpang shani ē Yawhan gaw, shi hpang de Yesu sa wa ai hpe, hkap mu wu yang, Mungkan ga a yubak gun la kau ya ai, Karai Kasang a Sagu kasha hpe yu yu mu!

30 Ngai hta shawng nga ai wa langai mi, nye a hpang ē du na ra ai; shi gaw nye a shawng ē rai nga sai, ngu nna ngai tsun ai wa gaw, ndai wa rai nga ai.

31 Ngai gaw, shi kadai re ai mung n chyē nngai; rai ti mung, shi gaw Israela masha ni a man e dan pru na matu, hka hta baptisma jaw let, ngai du sa nngai, nga ai.

32 Dai hta kaga Yawhan gaw, Wenyi gaw sumsing lamu de nna hkrudu zawn yu hkrat wa ai hpe, ngai mu se ai: dai wenyi mung shi a ntsa ē a nga nga ai.

33 Ngai gaw, shi kadai re ai mung n chyē nngai; rai ti mung, ngai hpe hka hta baptisma jaw shăngun dat ai wa, ngai hpe tsun nngai gaw, Kadai wa a ntsa e, dai Wenyi yu hkrat wa nna nga nga ai hpe, nang mu ai rai yang, dai wa gaw chyoí pra ai Wenyi hta baptisma jaw ai wa rai nga ai, nga ai.

34 Dai hte maren ngai mu se ai rai nna, ndai wa gaw Karai Kasang a Kasha re ai, ngai sakse hkam we ai, nga nna sakse hkam ya wu ai.

35 Bai hpang shani e, Yawhan hte shi a sape lăhkawng rau tsap nga ma ai rai nna,

36 Yēsu lai sa wa nga yang, Yawhan gaw shi hpe mada yu nna, Karai Kasang a Sagu Kasha hpe yu yu mu! ngu mu ai.

37 Dai sape yan gaw shi tsun ai ga na nna, Yēsu kaw hkan sa ma ai.

38 Yēsu gaw kayin yu nna, dai yan hkan sa ai hpe mu wu yang, Nan hpa tam myit ta? ngu nna hkap san mu ai. Shan gaw, Rabai e, nang kanang nga n ta? ngu nna shi hpe nhtang san mu ai: (Rabai ngu ai ga lachyum gaw, Sara nga ai, rai nga ai).

39 Yēsu gaw, Sa ma rit, shaloi nan mu na mă rin dai ngu nna shan hpe tsun wu ai. Dai re ai măjaw, shan hkan sa nna, shi nga ai shăra kănang rē ai mung

mu ma jang, dai shăni tup shi hte rau nga nga ma ai: dai ahkying gaw ahkying shi dăram rai nga ai.

40 Yawhan tsun ai ga na nna, shi kaw hkan sa ai yan hta na lăngai mi gaw, Simun Petru a kănaou Andre rai nga ai.

41 Dai wa gaw shi a kăhpú Simun hpe shawng mu nna, An gaw Meshia hpe mu să ga ai, ngu nna shi hpe tsun dan wu ai: (Meshia ngu ai ga lăchyum gaw, Hkrustu nga ai, rai nga ai).

42 Shăloï shi gaw Yēsu hpang de shi hpe woi wa wu ai. Yēsu gaw shi hpe hkap yu nna, Nang gaw Yawhan a kăsha Simun rai nga ndai: nang Kehpa ngu ai mying lu na rin dai, ngu wu ai: (Kehpa ngu ai ga lăchyum gaw, Petru nga ai, rai nga ai).

43 Hpang shăni ē shi gaw Galile mung de rai wa măyu nga ai. Shăloï Yēsu gaw Hphilip hpe mu wu ai rai nna, shi hpe, Ngai kaw hkan nang rit, ngu wu ai.

44 Hphilip gaw Andre yan Petru nga ai Betsaida măre na rai nga ai.

45 Hphilip gaw Nahtanelia hpe mu nna, Mawshe gaw tăra laika ni hta, myihtoi ni mung myihtoi laika ni hta, shăang nna ka da ai, Yosep a kăsha, Nazaret măre na Yēsu hpe anhtē mu să gaw ai, ngu nna shi hpe tsun dan wu ai.

46 Nahtanelia gaw, Nazaret măre na arai kăja lăma mi pru lu a ni? ngu nna htan wu ai.

47 Hphilip gaw, she sa yu rit, ngu wu ai. Shăloï Yēsu gaw, Nahtanelia shi hpang de sa wa ai hpe mu wu yang, shi hpe shăang nna, Sawt ai myit n rawng ai, Israela măsha măjing hpe yu yu mu, ngu wu ai.

48 Nahtanelia gaw, Nang ngai hpe kănang nna chyē n ta? ngu nna shi hpe san wu ai. Yēsu gaw, Hphilip ē nang hpe gărai n shăga kaw nna, dai maihpang

hpun npu ē nang naw nga yang, ngai nang hpe mu de ai, ngu nna shi hpe htan wu ai.

49 Nahtanelia gaw, Rabai ē, nang gaw Kărai Kăsang a Kăsha rai nga ndai; Israela măsha ni a hkawhkam nang rai nga ndai, ngu nna shi hpe htan wu ai.

50 Shăloï Yēsu gaw, Ngai nang hpe maihpang hpun npu ē mu de ai, ngu ai măjaw, nang kam n ni? dai hta grau kăba ai amu nang mu na rin dai.

51 Bai Yēsu gaw, Ngai nanhtē hpe teng teng tsun mă de ga, Sumsing lămu hpaw mălang Wa nna, Kărai Kăsang a lămu kăsa ni gaw, Măsha Kăsha a ntsa ē lung wu yu wa rai nga ai hpe, nanhtē mu na mă rin dai, ngu nna shi hpe htan tsun wu ai.

## 2

Dai hpang măsum ya du ai shăni ē, Galile mung na Hkana kăhtawng ē, num hkungran ai poi rai nga ai rai nna, Yēsu a kănu gaw dai poi hta lawm nga ai:

2 Yēsu hpe mung, shi a săpe ni hte nawng, dai poi de shăga mu ai.

3 Tsăbyi ma mat jang Yēsu a kănu gaw, Shanhtē tsăbyi n lu mă sai, ngu nna shi hpe tsun wu ai.

4 Shăloï Yēsu gaw, Numsha ē, ngai nang hte hpa seng a ta? nyē a ahkying gărai n du li ai, ngu nna shi hpe htan wu ai.

5 Rai ti mung shi a kănu gaw, Shi nanhtē hpe tsun mătsun gălaw mu, ngu nna shăngun ma ni hpe tsun da mu ai.

6 Ya dai yang ē, Yuda măsha ni a jăsan jăseng ai htung hte măren, dang lăhkawng măsum dăram ram shang ai, nlung yam kru shădun tawn ai nga mă lu ai.

7 Yēsu gaw, Ndai yam ni hta ntsin ja bang jăhpring mu, ngu nna shăngun ma ni hpe tsun mu ai: dai rai nna shanhtē

gaw, yam nten dem rai hkra hkra ja bang ma ai.

8 Bai Yēsu gaw, Ya kāmai la nna poi up wa hpe wa jaw mu, ngu nna shanhtē hpe tsun wu yang, shanhtē wa jaw ma ai.

9 Poi up wa gaw ntsin na byin ai tsābyi hpe chyim yu nhtawm, dai kānang na lu la ai gaw, ntsin ja ai ma ni chyē ma ti mung, poi up wa gaw n chyē wu ai majaw, la nnan wa hpe shāga la nna,

10 Māsha ni kādai mung tsābyi kāja shawng jaw ga ma ai; dai lu law ma jang she, n jet ai baw jaw ma ai: nang gaw tsābyi kāja hpe ya du hkra kyem da ndai, ngu wu ai.

11 Shing rai Yēsu gaw shi dan ai lāmik kumla ni hta, shawng dan hpang ai gaw, Galile mung na Hkana kāhtawng ē dan nna, shi a hpung shinkang dan shāpraw wu ai: shi a sāpe ni mung, shi hpe kam sham rna ai.

12 Dai hpang shi gaw, kānu, kānau ni hte shi a sāpe ni hte nawng, Kaperua-um māre de yu wa nna, dai yang ē mung, gāde ya wa n hkring nga ma ai.

13 Ya Yuda māsha ni a Shālai wa poi du wa ra ai rai nna, Yēsu gaw Yerusalem māre de lung wa sai.

14 Shālai naw ku Htingnu ē sāgu, dumsu, hkrudu dut ai ni hte, gumhpraw byan sha ai ni dung nga ma ai hpe. shi mu wu ai rai nna,

15 Shingri hte gālaw ai lāsik la nhtawm, shanhtē mahkra hpe mung, sāgu dumsu ni hpe mung. dai nta na shāchyt nna, gumhpraw byan sha ai ni a gumhpraw ni hpe ru kan ya ai hte, shanhtē a ku ni hpe kānawng kādawng kau ya mu ai:

16 Hkrudu dut at ni bpe mung, Ndai rai ni la wa mu; nyē Wa a nta bpe hpāga nta hkum shātai mu, ngu nna tsun mu ai.

17 Dai shālai, Na nta hta manoi ai nja nhprā myit gaw, ngai e sha kau na

ra ai, nga nna ka da ai ga hpe, sāpe ni dum ma ai.

18 Shing rē ai mājaw Yuda māsha ni gaw. Nang ning rai gālaw ai gaw anhtē hpe hpa lāmik kumla mādun dan n ta ngu nna shi hpe tsun mu ai.

19 Yēsu gaw, Ndai htingnu hpya kau mu; māsum ya lāman ngai dai hpe shārawt na we ai. ngu nna shanhtē hpe htan mu ai.

20 Shing nga ai mājaw Yuda māsha ni gaw, Ndai naw ku Htingnu hpe māli shi kru ning tup gālaw ai re ai, nang chyawm gaw māsum ya lāman shārawt lu na wu ni? ngu mu ai.

21 Rai ti mung, Yēsu tsun ai gaw. shi a hkum hkrang ngu ai htingnu hpe, shāng nna nga ai, rai nga ai.

22 Dai rē ai mājaw si ai ni kaw na hkrung shārawt la ai hkrum wu ai shāloi, sape ni gaw shi shing nga tsun ai ga hpe dum ma ai rai nna, Chyum laika hpe mung, Yēsu tsun da ai ga hpe mung, kam sham ma ai.

23 Dai Shālai wa poi nhtoi ni a lāman Yerusalem mare hta shi naw nga nga yang, māsha law law wa, shi Dan ai lāmik kumla mu lu ma ai mājaw, shi a, mying ningsang hpe kam sham ma ai.

24 Yēsu chyawm gaw, māsha yawng māyawng a lam chyē da wu ai mājaw mung, māsha kraw kāta kāning nga ai myit rawng nga ai hpe, shi nan chyē nga ai rai nna,

25 Māsha wa a lam hpe gāde ai muk sakse sa hkam ya na, n ra ai mājaw mung, shi hkum nan shanhtē hta myit n krem da wu ai.

### 3

Rai ti mung, Yuda māsha ni hta sālang rai nga ai Nikodi mying ai Hparishe lāngai mi nga ai:

2 Dai wa gaw shāna ē Yēsu kaw sa nna, Rabai ē, nang gaw Kārai Kāsang

kaw nna du sa ai sāra rai nga ndai hpe, anhtē chyē ga ai: nang dan ai lāmik kumla ni gaw, Kārai Kāsang n lawm yang gaw, kādai mung n gālaw lu ai, ngu nna shi hpe tsun wu ai.

3 Yēsu gaw, Ngai nang hpe gāja wa teng teng tsun de ga, Ntsa de nna n shāngai ai māsha gaw, Kārai Kāsang a mungdan mu lu na n rai, ngu nna shi hpe htan wu ai.

4 Bai Nikodi gaw, Māsha gaw aprat kāba sā yang, kāning rai bai shāngai lu na a ta? kānu a hkritung de bai shang nna shāngai lu na a ni? ngu nna san wu yang,

5 Yēsu gaw, Ngai nang hpe gāja wa teng teng tsun de ga, Hka hte Wenyi ē n shāngai ai māsha gaw, Kārai Kāsang a mungdan hta shang lu na n rai;

6 Hkum shan hte shāngai ai gaw, hkum shan rai nga ai; wenyi hte shāngai ai chyawm gaw, wenyi rai nga ai.

7 Ntsa de nna shāngai lu na myit dai, ngu nna ngai tsun ai hpe hkum mau ēt.

8 Nbung gaw bung wa māyu ai de bung wa nna, de a wu ai nsen hpe nang na dat wu ti mung, kānang na bung wa nna, gāde rai wa ai gaw nang n chyē dat ndai; dai hte māren Wenyi ē shāngai ai māsha shāgu mung shing rai nga ai, ngu nna htan wu ai.

9 Shālai Nikodi gaw, Dai gaw kāning rai byin lu na a ta? ngu nna shi hpe bai san wu yang,

10 Yēsu gaw nang gaw Isrela māsha ni hta sāra wa mi ting rai da nhtawm ndai lam nang n chyē n ni?

11 Ngai nang hpe gāja wa teng teng tsun de ga, Anhtē gaw tinang chyē ai lam tsun ga ai, mu yu sā ga ai hte māren sakse hkam ga ai; rai ti mung anhtē a sakse ga hpe, nanhtē n hkap la myit dai.

12 Dinghta ga hte seng ai lam sha ngai tsun yang pyi, nanhtē n kam lu

myit yang gaw, sumsing lamu hte seng ai lam wa, ngai tsun mā de yang gaw kāning rai kam lu na myit ta?

13 Sumsing lāmu de na yu hkrat wa ai hte, sumsing lāmu ē nga nga yu ai Māsha Kāsha hta kāga, kādai mung sumsing lāmu de lung wa yu ai n rai.

14 Mawshe gaw nam māli ē lāpu hpe shārawt da ai zawn,

15 Māsha Kāsha hta kam sham ai ni nlāng htē gaw, htani htana asak lu la hkra, Māsha Kāsha mung shārawt da ai hkrum na ra ai.

16 Kāning rai nme law, Kārai Kāsang a Kāsha hpe kam sham ai ni nlāng htē gaw, hten bya n hkrum ai sha, htani htana asak lu la mu ga nga, Kārai Kāsang gaw shi a Kāsha shingtai hpe jaw kau ai kaw du hkra, mungkan ga hpe tsaw ra wu ai.

17 Mung kan ga hpe tāra dāra u ga nna, Kārai Kāsang gaw dai Kāsha hpe mungkan ga de shāngun dat wu ai n rai; mungkan ga gaw shi a mārang ē hkye hkrang la ai hkrum lu na she, shāngun dat wu ai.

18 Shi hpe kam sham ai wa gaw tāra dāra ai n hkrum lu ai; n kam n sham ai wa chyawm gaw, Kārai Kāsang a Kāsha shingtai a mying ningsang hpe n kam n sham ai mājaw, ya ē pyi tāra data ai hkrum nga ai.

19 Tāra dāra ngu ai mung, Nhtoi gaw mungkan ga de shang sai, rai ti mung, māsha ni a arawn alai n shawp. nga ma ai mājaw, shanhtē gaw nhtoi hta nsin hpe grau tsaw ma ai, dai gaw tāra dāra hkrum ai lam nan rai nga ai.

20 Kāning rai nme law, n shawp n kap ai amu gālaw ai wa gaw, nhtoi hpe n dawng n wawm nga ai rai nna, tinang gālaw ai amu mājaw, dāru shārin kau ai n hkrum n ga nga, nhtoi de n sit sa wa ai.

21 Teng man ai lam hkan gālaw ai wa chyawm gaw, tinang gālaw ai amu

Kārai Kāsang hta shāchyen nga ai gaw, dan pru u ga nga, dai nhtoi de sit sa wa ai, ngu nna shi hpe htan wu ai.

22 Dai hpang ē Yesu gaw shi a sāpe ni hte nawng, Yuda mung hkan ē du hkawm ma ai rai nna, dai yang ē shanhtē hte rau hkring nga nna baptisma jaw wu ai.

23 Yawhan mung, Salim mākau na Enun ngu ai shāra e, hka law nga ai mājaw, dai yang ē baptisma jaw let nga nga ai rai nna, mung māsha ni gaw dai de baptisma sa hkam ma ai.

24 Kāning rai nme law, Yawhan gaw htawng hta jāhkrat kau ai, gārai n hkrum wu ai.

25 Dai rē ai mājaw, Yawhan a sāpe ni gaw, dai jāsan jāseng ai lam a nhkan ē Yuda māsha lāngai mi hte ndang kālang hkat ma ai.

26 Dai rai nna shanhtē gaw Yawhan hpang de wa nhtawm, Rabai ē, Yawdan hka wora hkran ē nang hte rau nga nna, nang sakse hkam ya ai wa gaw, yu u, shi mung baptisma jaw nga ai rai nna, yawng māyawng shi hpang de du sa ma ai, ngu nna shi hpe tsun dan mu ai.

27 Shāloī Yawhan gaw, sumsing lāmu de na jaw ai sha n rai yang gaw, māsha gaw hpa mung n lu Ia lu ai.

28 Ngai gaw Hkristu n rai nngai, shi a shawng ē shāngun dat ai wa she rai nngai, ngu nna ngai tsun ni ai gaw, nanhtē nan nyē a sakse ni rai nga myit dai.

29 Num nnan lu ai wa gaw, Ia nnan rai nga ai; la nnan a mākau ē tsap nga nna, shi a ga na Ia ai jingku wa gaw, Ia nnan a nsen mājaw ja ja kābu nga ai: shing rē ai kābu gāra lam gaw, ngai hta dik wa sa Ii ai.

30 Shi gaw jat wa na ra ai, ngai chyawm gaw yawm wa na rai nga nngai.

31 Ntsa de nna du sa ai wa gaw, yawng a ntsa na rai nga ai: dinghta ga na rai nga ai wa gaw, dinghta ga hte seng nga ai rai nna, dinghta ga a lam sha chyē tsun nga

ai: sumsing lamu de nna du sa ai wa chyawm gaw, yawng a ntsa na rai nga ai.

32 Mu māmu na māna a lam shi sakse hkam nga ai; shi hkam ai sakse hpe gāde ai muk n hkap Ia ya mu ai.

33 Shi a sakse lam hpe hkap la ai wa chyawm gaw, Kārai Kāsang gaw teng man nga ai, nga nna dāzik shākap ai wa rai nga ai.

34 Kārai Kāsang ē shāngun dat ai wa gaw, Kārai Kāsang a mung ga tsun nga ai: kāning rai nme law, Kārai Kāsang gaw shādawn shāram nna sha, Wenyi jaw wu ai n rai.

35 Kāwa gaw Kāsha wa hpe tsaw ra wu ai rai nna, yawng māyawng shi a lāta hta ap ya nu ai.

36 Kāsha wa hpe kam sham ai wa gaw, htani htana asak lu la wu ai: Kasha wa a ga hpe n mādat ai wa chyawm gaw, asak hkrung lam mu na wu ai n rai: Kārai Kāsang a sindawng kāhtet ai gaw, dai wa a ntsa ē a nga nga ai, ngu nna htan mu ai.

#### 4

**Y**ēsu gaw shi hkum nan baptisma n jaw ti mung, shi a sāpe ni jaw ma ai rai nna,

2 Yēsu gaw Yawhan hta grau nna sāpe shātai ai hte baptisma jaw nga ai gaw, Hparishe ni na mā sai hpe, dai Mādu chyē wu jang.

3 Yuda mung na shi pru nhtawm, Galile mung de bai wa ai.

4 Shāloī shi Samari mung kāang hku ga wa lu na rai nga ai.

5 Dai mājaw shi gaw, Yaku ē shi a kāsha Yosep hpe jaw ai ga dāchyawk mākau na, Suhka ngu ai Samari mung na māre lāngai mi de du wa ai: dai yang ē Yaku a hka htung nga nga ai.

6 Yēsu gaw lam hkawm ba ai mājaw, dai hka htung mākau ē dung nga ai: dai aten gaw hkying kru dāram rai nga ai.

7 Shāloī Samari numshā lāngai mi hka ja na pru sa ai: Yēsu gaw, Ngai hpe ntsin jaw lu e, ngu nna shi hpe hpyi wu ai:

8 Shi a sāpe ni chyawm gaw shahpa māri na mātu, mare de sa mat ma ai.

9 Dai rai nna Samari numsha gaw, Nang Yuda māsha rai da nhtawm me, ngai Samari numsha hpe, hpa rai ntsin hpyi n ta? ngu nna shi hpe tsun wu ai: kāning rai nme nga yang Yuda māsha ni gaw Samari māsha ni hte n kānawn ga ma ai.

10 Shāloī Yēsu gaw, Kārai Kāsang a kumhpa hte, Ngai hpe ntsin jaw lu e, nga nna nang kaw hpyi ai wa hpe, nang chyē wu taw gaw, nang shi kaw hpyi nna, shi gaw nang hpe hkrung ai ntsin jaw na nit dai, ngu nna shi hpe htan wu ai.

11 Dai numsha mung. Mādu e, nang ntsin ja na rai hpa mung n lu ndai, hka htung mung sung nga ai; dai rē ai mājaw dai hkrung ai ntsin gaw, nang kānang na lu n ta?

12 Anhtē a Wa; Yaku gaw ndai hka htung anhtē hpe jaw da mā ni ai rai nna, shi hkum nan hte shi a kāshu kāsha ni, shi a yam nga ni, ndai hta na lu mā sai: nang gaw shi hta grau kāba n ni? ngu nna shi hpe tsun wu ai.

13 Shāloī Yēsu gaw, ntsin ndai lu ai wa kādai mung, hpang bai gāra na ra ai; ngai jaw ai ntsin lu ai wa chyawm gaw, gāloī mung hpang gāra na n rai:

14 Dai ngai jaw ai ntsin gaw, dai wa hta htani htana asak a mātu lāwi pru ai hka hpawk tai na ra ai, ngu nna shi hpe htan wu ai.

15 Shāloī dai numsha gaw, Mādu e, ngai hpang mung n gāra, nang de mung hka n sa ja ra n ga, ntsin dai jaw ē ngu nna shi hpe hpyi wu ai.

16 Yēsu gaw, Na mādu wa hpe naw wa shāga Ia nna, nang de sa rit, ngu wu ai.

17 Dai numsha gaw, Ngai la n lu nngai, ngu nna htan wu ai. Yēsu gaw, Ngai Ia

n lu nngai, nga nna nang tsun ai ga gaw, rai nga lit dai:

18 Kāning rai nme law, nang la mānga lu yu nit dai; ya na Ia gaw, na a mādu wa n rai lit dai; ndai lam hta nang teng ai ga tsun nit dai, ngu nna shi hpe tsun wu ai.

19 Shāloī dai numsha gaw. Mādu ē, nang myihtoi rai nga ndai ngai dum se ai:

20 Anhtē a ji wa ni gaw ndai bum ē naw ku ga ma ai: nanhtē chyawm gaw naw ku rnai ai shāra, Yerusalem māre ē sha rai nga ai, nga nna tsun ga myit dai. ngu wu ai.

21 Yāsu gaw. Numsha ē. nyē ga hpe kam u: ndai burn ē mung n rai, Yerusalem māre ē mung n rē ai, wa hpe naw ku na aten gaw du na ra ai.

22 Nanhtē gaw tinang n chyē ai hpe naw ku myit dai; anhtē chyawm gaw tinang chyē ai hpe naw ku ga ai: kāning rai nme law, hkye hkrang Ia ai lam gaw. Yuda amyu hta na ral nga ai.

23 Rai ti mung, teng man ai hku naw ku ai ni gaw. wenyi hta mung, teng man ai hta mung, Wa hpe naw ku na aten gaw. du wa ra ai rai nna, ya ē pyi rai nga ai: Wa gaw shing rai naw ku ai ni hpe tam nga ai.

24 Kārai Kāsang gaw Wenyi rai nga ai: shi hpe naw ku ai ni gaw, wenyi hta mung, teng man ai hta mung, naw ku lu na rai nga ai, ngu nna shi hpe tsun wu ai.

25 Dai numsha mung, Hkristu ngu ai Meshia du na ra ai gaw, ngai chyē nngai; dai wa du jang gaw, shi anhtē hpe lam māgup tsun mādun na ra ai, ngu wu ai.

26 Shāloī Yēsu gaw, Nang hte ga tsun nga ai, ngai gaw, dai wa nan rai nngai, ngu nna shi hpe tsun wu ai.

27 Dai shāloī shi a sāpe ni du wa nna, shi numsha hte shāga nga ai hpe, wa

mau ma ai; rai ti mung, Nang hpa ra n ta? ngu na mung, Shi hte hpa rai shäga nga n ta? ngu na mung, gäde ai muk n san wam mu ai.

28 Dai rai nna dai numsha gaw, shi a ntsin dibu tawn kau da nna, märe de bai wa nhtawm, märe mäsha ni hpe,

29 Ngai gälaw ai lam yawng, ngai hpe bai tsun dan ya ai wa hpe sa yu mä ru: dai wa gaw Hkristu rai na kun? ngu nna wa tsun mu ai.

30 Shanhëtë mung märe de na pru sa nna, shi kaw sa du ma ai.

31 Dai läman ē sâpe ni gaw, Rabal ē, shat sha u, ngu nna shi hpe agaw mu ai.

32 Shi gaw, Nanhtë n chyē ai shahpa ngai lu da we ai, ngu nna shanhëtë hpe htan mu ai.

33 Dai mäjaw sâpe ni gaw, Mäsha längai ngai shi e shat sa jaw mä sai kun? nga nna shäda san tsun ma ai.

34 Dai rai nna Yësu gaw, Ngai e shängun dat ai wa a myit hku hkan galaw na hte, shi a mägam bungli shängut lu na gaw, nyē a shähpa rai nga li ai.

35 Nanhtë gaw, Ya shäta mäli naw ra ai, dai lai jang she mam dan ten du na rē ai, nga myit dai nrai myit ni? Yu mu, ngai nanhtë hpe tsun mä de ga, yi hkauna ni hta dan na mam, ya ē pyi myin htoi nga ai hpe, shärawt mäda yu mu:

36 Gat ai wa hte dan ai wa rau käbu lu na she, dan ai wa mung shäbrai lu Ia nna. htani htana asak a mätu nsi nai si shu la lu ai.

37 Käning rai nme law, längai mi gaw gat, längai mi gaw dan rē ai, nga ai ga gaw, ndai yang ē gäja teng nga ai.

38 Nanhtë n-gun n dat ai kaw na dan Ia nu, ngai nanhtë hpe shängun dat mä de ai: mäsha käga ni mäkan bungli gälaw mä sai rai nna, nanhtë gaw shanhëtë a mäkan bungli bta shang

la nga myit dai, ngu nna shanhëtë hpe tsun mu ai.

39 Dai numsha ē, Ngai gälaw ai lam yawng shi ngai hpe bai tsun dan ya ai, nga nna sakse hkam ai ga mäjaw, dai märe na Samari mäsha law law wa, Yësu hpe kam sham ma ai.

40 Dai rai nna, Samari mäsha ni shi hpang de du ma yang, shanhëtë hte a nga nga na hpyi ma ai mäjaw, dai yang ē ni ni hkring nga ai.

41 Shi a ga mäjaw mung karn sham ai ni grau law wa ma ai:

42 Dai ni gaw dai numsha hpe, Ya gaw, na a ga mäjaw sha anhtë kam sham ai n rai sä ga ai : anhtë nan na Ia lu nna, ndai wa gaw mungkan ga a Hkye hkrang Ia ai Mädu teng teng rai nga ai chyē sä ga ai, ngu mu ai.

43 Ni ni lai jang shi gaw dai yang na pru nna, Galile mung de rai mat wa ai:

44 Käning rai nme law, myihtoi gaw tinang mung ē arawng n lu ga ai, nga nna Yësu gaw shi hkum dai sakse hkam nga ai.

45 Dai rai nna, Galile mung de du jang, Galile mäsha ni gaw poi nhtoi rai yang na, Yerusalem märe ē shi gälaw dan ai amu mahkra hpe mu ma ai mäjaw, shi hpe hkap Ia ma ai: käning rai nme nga yang, shanhëtë mung dai poi de sa ma ai.

46 Dai mäjaw shi gaw, ntsin hpe tsäbvi shäta ai shära, Galile mung na Hkana kähławng de bai sa du ai. Shäloï ē Kaperna-um mare na du längai mi a shädang sha gaw mächyi nga lu ai.

47 Yësu gaw Yuda mung na Galile mung de du wa ai hpe, dai du wa na wu yang, shi Yësu hpang de sa nna, shi a käsha hpe yu wa shämai ya na hpyi wu ai: shi gaw si wa mägang nga ai.

48 Dai rē ai mäjaw Yësu gaw, Nanhtë lämik kumla hte mauhpa amu n mu myit yang gaw, nanhtë hpa mung n

kam n sham myit dai, ngu nna shi hpe tsun wu ai.

49 Dai du wa chyawm gaw, Mädu ē, ngai sha gärai n si yang yu wa ga law, ngu nna hpyi wu yang,

50 Yësu gaw, Wa nu, na nsha gaw bran sä lit dai, ngu nna shi hpe tsun dat wu ai. Dai du wa gaw, Yësu tsun ai ga hpe kam let wa mat ai.

51 Shing rai shi wa nga yang, shi a mäyam ni shi hpe sa tau nna, käsha bran sai lam, tsun dan mu ai.

52 Dai mäjaw mächyi bran ai aten ahkying san wu yang, shanhëtë gaw, Mäni ahkying sănit ē hkum kähtet ai gaw kawp mat sai, ngu nna htan mu ai.

53 Dai rai nna dai ahkying gaw, Na nsha bran sä lit dai, nga nna Yësu shi hpe tsun ai ahkying nan rai nga ai hpe, käwa chye wu ai rai nna, shi hkum nan hte shi a nta mäsha nlang htë gaw, kam sham mat ma ai.

54 Ndai lämik kumla gaw Yësu Yuda mung na, Galile mung de du wa ai, lähkawng lang bat yang na lämik kumla rai nga ai.

## 5

Dai hpang Yuda mäsha ni a poi längai mi nga ai rai nna, Yësu gaw Yerusalem märe de lung wa ai.

2 Ya Yerusalem märe hta dai sägu chyinghka mäkau ē, járawp mänga gap da ai hte, Hebre ga hku Behtesda ngu ai hka lawng längai mi nga ai.

3 Dai járawp ni hta, mächyi mäkaw rē ai, myi kyaw ai, lágaw hten ai, hkum kätsing si ai mäsha law law taw nga ma ai, (rai nna, hka shamu wa na hpe a la nga ma ai).

4 Shing re ai lam gaw, shi a ten du ai shaloi, lamu käsa gaw dai hka lawng na hka hpe sa shämwat dat jang, dai hta shawng shang bang lu ai wa, ana a hkyia ma hkra kawna shämai sätsai

ya hkrum ai ngu kam ma ai majaw rai nga ai.)

5 Dai yang ē sumshi mätsat ning tup mächyi ai mäsha längai mi mung lawm nga ai.

6 Yësu gaw dai wa käleng taw nga ai hpe mu nna, shing rai mächyi nga ai na Ia sai, chyē wu ai mäjaw, dai wa hpe, Nang mai mäyu n ni? ngu nna san wu ai.

7 Dai mächyi ai wa gaw, Mädu ē, hka shämu jang, hka lawng de ngai hpe woi shang na mäsha n lu nngai; ngai shang sa wa nga yang, mäsha käga längai ngai nyē a shawng e shang mat mat rē ai, ngu nna shi hpe htan wu ai.

8 Shäloï Yësu gaw, Rawt u, na a hpun pänep la hpai nna hkawm wa su, ngu nna dai wa hpe tsun wu ai.

9 Dai wa gaw shäloï jang mai mat ai rai nna, shi a hpun pänep hpai let hkawm mat wa ai.

10 Dai shäni gaw läban nhtoi rai nga ai. Dai rē ai mäjaw Yuda mäsha ni gaw, dai mächyi mai ai wa hpe, Dai ni läban nhtoi rai nga ai rai nna, nang hpun pänep n mai hpai ndai, ngu mu ai.

11 Shäloï dai wa gaw, Ngai e shämai ya ai wa ē Na a hpun pänep la hpai nna hkawm wa u ngu nngai, ngu nna shanhëtë hpe htan wu ai.

12 Shanhëtë gaw, Nang hpe Hpun pänep Ia hpai nna hkawm wa u, nga ai wa gaw, kädai wa rai ta? ngu nna san mu ai.

13 Rai ti mung, mächyi mai ai wa gaw kädai rē ai mung n chyē dat wu ai: käning rai nme law, dai yang ē mäsha hpawng nga ai mäjaw Yësu gaw mäyun pru mat wa sai.

14 Dai hpang Yësu gaw naw ku Htingnu e dai wa hpe mu hkrup nna, Yu u nang ya hkam käja nit dai: shawng na hta grau ai tsinyam n hkrum n ga, yubak hkum bai gälaw ēt, ngu nna shi hpe tsun wu ai.

15 Dai wa gaw pru wa nna, shi hpe shāmai ya ai wa gaw Yēsu rai nga ai hpe, Yuda māsha ni e tsun dan wu ai.

16 Lāban nhtoi ē shing rē ai amu gālaw ai mājaw, Yuda māsha ni gaw Yēsu hpe zingri shātsang mu ai.

17 Shāloi Yēsu gaw, Nye Wa gaw ya du hkra pyi amu a gālaw nga ai rai nna, ngai mung gālaw nngai, ngu nnā shanhtē hpe htan mu ai.

18 Dai rai nna, lāban nhtoi jāhprai ai hta n-ga, Kārai Kāsang hpe nan shi a Kāwa nga nna, shi hkum dai hpe Kārai Kāsang hte shābung wu ai mājaw, Yuda māsha ni gaw shi hpe sat kau lu na lam grau nna tam ma ai.

19 Dai rē ai mājaw Yēsu gaw, Ngai nanhtē hpe gāja wa teng teng tsun ma de ga, Kasha gaw tinang a myit hte hpa mung n galaw lu ai; Kāwa gālaw ai lam mu māmu hpe sha hkan gālaw lu ai: Kāwa gālaw ai lam shāgu, Kāsha mung hkan gālaw lu na rai nga ai.

20 Kāwa gaw Kāsha hpe tsaw ra wu ai rai nna, shi hkum dai gālaw ai lam yawng māyawng Kāsha wa hpe mādun wu ai: nanhtē mau māhka hkra, ya na hta grau kāba ai lam ni hpe mung, Kāsha wa hpe rnādun na ru ai.

21 Kāning rai nme law, Kāwa gaw si ai ni hpe shārawt nna jāhkrung ya ai hte māren, Kāsha wa mung shi ra māra ni hpe jāhkrung ya wu ai.

22 Dai hta kāga, Kāwa hpe hkungga ai hte māren, māsha yawng Kāsha wa hpe hkungga mu ga nga, Kāwa gāw kādai hpe mung tāra n dāra ai sha, tāra dāra ai ahkang mahkra Kāsha wa hpe ap ya nu ai.

23 Kāsha wa hpe n hkungga ai wa gaw, shi e shāngun dat ai Kāwa hpe mung n hkungga ai rai nga ai.

24 Nanhtē hpe ngai gāja wa teng teng tsun ma de ga, Nyē a ga mādat nna ngai e shāngun dat ai wa hpe kam sham ai

wa gaw, htani htana asak lu la wu ai rai nna, tāra daw dan ai kaw n du ai sha, si nga ai kaw nna hkrung nga ai de, kawt lai wa sai.

25 Ngai nanhtē hpe gāja wa teng teng tsun māde ga, si nga ai ni gaw, Kārai Kāsang a Kāsha a nsen na lu na ahkying du wa ra ai rai nna, ya ē pyi rai nga ai: na la ai ni mung hkrung nga na māra ai.

26 Kāning rai nme nga yang, Kāwa gaw shi hkum dai hta asak rawng nga ai hte māren, Kāsha wa hpe mung, shi hkum dai hta asak rawng lu na lam jaw nu ai rai nna,

27 Shi gaw Māsha Kāsha rai nga ai mājaw, tāra dāra na ahkang mung shi e ap ya nu ai.

28 Dai lam hpe hkum mau myit, kāning rai nme law, lup ni hta rawng nga ai ni nlang hte gaw shi a nsen na nna pru lu na ahkying du na ra ai:

29 Kāja ai lam hkan gālaw ai ni gaw, asak hkrung ai a bai rawt ai de, n shawp ai lam hkan gālaw ai ni gaw, tāra daw dan hkrum ai a bai rawt ai de, pru lu na mār ai.

30 Ngai gaw nyē a myit hte hpa amu mung n gālaw lu nngai: ngai gaw na ai hte māren sha jēyang nngai; nyē a jēyang ai hku mung ding man Ii ai: kāning rai nme law, ngai gaw nyē myit hku hkan na n tam nngai, ngai e shāngun dat ai wa a myit hku hkun na she tam nngai.

31 Ngai dai dai nyē a lam sakse hkam Ia nngai rai yang gaw, ngai hkam ai sakse teng na li ai n rai:

32 Nyē a lam sakse hkam ai wa gaw, kāga mi she nga ai: dai wa nyē a lam hkam ya ai sakse gaw, teng man ai sakse rai nga ai hpe, ngai chyē nga nngai.

33 Nanhtē gaw Yawhan hpang de kāsa shāngun dat myit dai rai nna, shi gaw teng man ai lam māga de sakse hkam ya nu ai.

34 Ngai lu ai sakse chyawm gaw māsha kaw na n rai: rai ti mung, nanhtē hkye hkrung la ai kaw du myit ga, ngu nna ndai lam ngai tsun nngai.

35 Yawhan gaw tu grung ai hte htoi nga ai pyengdin rai nga ai rai nna, nanhtē gaw shi a ahtoi hta ē, tawng mārang mi kābu nga māyu myit dai.

36 Rai ti mung, ngai lu ai sakse gaw Yawhan hkam ya ai sakse hta grau kāba Ii ai: kāning rai nme nga yang, Wa gaw, ngai gun hpai shāngut na mātu ngai hpe ap ya nna, ya ngai gun hpai nga ai amu ni ē pyi, ngai hpe Wa ē shāngun dat ai lam sakse hkam ya nga ai.

37 Ngai hpe shāngun dat ai nye Wa mung nyē a lam sakse hkam ya ni ai. Nanhtē gaw shi a nsen gālo mung n na yu myit dai: shi a gawng shing-yan hpe mung n mu yu myit dai:

38 Dai hta kāga shi a mung ga mung nanhtē hta n rawng lu ai: kāning rai nme law, shi shāngun dat ai wa hpe, nanhtē n kam n sham myit dai.

39 Chyum laika ni hta nna nanhtē htani htana asak lu la na rē ai, nga nna myit myit dai mājaw, dai laika ni hta nanhtē hkan sawk yu yu rai myit dai: dai laika ni nan nyē a lam sakse hkam nga ai:

40 Dai rē ai mi, asak hkrung ai lu la na mātu nanhtē gaw ngai hpang de n sa māyu myit dai.

41 Māsha jaw ai arawng sādang gaw ngai n hkam la nngai:

42 Rai ti mung, Kārai Kāsang a tsaw ra ai myit nanhtē hta n rawng nga ai gaw, ngai chyē nngai.

43 Ngai gaw nyē Wa a amying hte du sa nngai rai ti mung, nanhtē ngai hpe n hkap la myit dai: kāga wa mi tinang a amying hte du sa ai rai taw gaw, dai wa hpe nan hte hkap Ia nā rai nga myit dai.

44 Shāda da jaw ai arawng sādang hkam Ia nna, lāngai sha rai nga ai Kārai

Kāsang ē jaw ai arawng sādang hpe n tam ai ni nanhtē wa mi, kāning rai kam sham lu na myit ta?

45 Wa a man ē ngai nanhtē hpe māra shāgun na hkum nawn myit: nanhtē hpe māra shāgun na wa gaw lāngai mi she nga ai; dai wa gaw, nanhtē shāmyet shānat nga ai Mawshe nan rai nga ai.

46 Mawshe hpe nanhtē kam myit dai rai yang gaw, ngai hpe mung kam na mānit dai: kāning rai nme law, Mawshe gaw nyē a lam ka da nu ai.

47 Shi ka da ai laika ni hpe, nanhtē n kam myit yang gaw, nyē a ga hpe kāning rai kam lu na myit ta? ngu nna shanhtē hpe tsun mu ai.

## 6

Dai hpang Yēsu gaw, Tiberi ngu ai Galile nawng wora hkran de rap sa wa ai.

2 Māchyi mākaw hkrum ai ni hta, shi gālaw dan ai lāmkum kumla ni hpe mu ma ai mājaw, māsha wunawng kāba shi kaw hkan nang ma ai.

3 Shāloi Yēsu gaw dai bum de lung wa nna, shi a sāpe ni hte rau dung ngai ai.

4 Ya, Shālai wa ai poi ngu ai, Yuda māsha ni a poi, du na ni wa sai.

5 Dai rē ai mājaw Yēsu māda yu nna, māsha wunawng kāba shi kaw sa wa ai hpe mu wu yang, shi gaw Hphilip hpe Ndai ni sha na muk anhtē kānang sa māri na i? ngu nna san wu ai.

6 Shing nga san ai gaw, Hphilip hpe chyam yu na nga nna rai nga ai: kāning rai nme law, kāning di na gaw, shi dai chyē da nu ai.

7 Hphilip gaw, Gumhpraw ni tsa a mātu māri ti mung, māsha hkum shāgu. kāchyi mi hpra shi na pyi law na n rai. ngu nna htan wu ai.

8 Shāloi, shi a sāpe ni hta na Simun Petru a kānau Andre gaw,

9 Muk-yaw muk tawng māṅga hte, nga lāhkawng lu ai lasha ma lāngai mi nang ē nga nga ai; rai ti mung, nde wa law ai masha ni a mātū gaw kānang dang law na rai ta? ngu nna tsun dan wu ai.

10 Yēsu gaw, Māšha ni hpe dung nga shāngun mu, ngu mu āi. Dai yang ē tsingdu mung htat nga ai. Shing rai lasha hkying māṅga dāram dung nga ma ai.

11 Shāloī Yēsu gaw dai muk tāwng ni hpe Ia nna, shākawn ya nhtawm, dung nga ai ni hpe kāran jaw wu ai; dai hte maren nga hpe mung shanhtē ra ai made, kāran jaw mu ai.

12 Shanhtē sha hkru ma jang, shi gaw, Hpa mung n mat u ga, ngam ai ahkyep alep ni hpe hkan hta Ia mu, ngu nna shi a sāpe ni hpe tsun mu ai.

13 Dai hte māren shanhtē hkan hta Ia nna, dai muk-yaw muk tawng māṅga hta na, sha ai ni a ngam ai ahkyep alep, mung shi lāhkawng hpring tup lu la ma ai.

14 Dai rē ai mājaw, shi mādun ai lāmik kumla hpe shāwa māšha ni mu ma yang, shanhtē gaw, Gāja wa teng teng ndai wa gaw mungkan ga de du sa ra ai myihtoi rai nga ai, nga ma ai.

15 Dai masha ni gaw shi hpe adip Ia nna. hkawkam shātai na maw ma ai hpe. Yēsu chyē wu ai mājaw, shi hkrui sha dai bum de bai māyun lung mat wa ai.

16 Shāna de du jang shi a sāpe ni gaw nawng de yu wa nna,

17 Ijawn nhtawm, nawng wora hkran na Kaperna-um mare de rap sa wa ma ai. Ya nsin sin nna, Yēsu mung shanhtē kaw gārai n du wa ai:

18 Nbung lāru mung ru wa ai rai nna, nawng ē hka leng ni hta nga ai.

19 Dai rē ai mājaw mai māsum māli dāram shap sa wa sā yang, Yēsu gaw hka ntsa ē hkawm let, Ii mākau du hkra

du sa wa ai hpe, shanhtē hkrap mu nna, hkrit kājawng nga ma ai.

20 Shi chyawm gaw, Ngai she rai nngai, hkum hkrit myit. ngu wu ai.

21 Dai mājaw shanhtē gaw shi hpe Ii hta hkrap shālun Ia māyu ma ai rai nna, dai li mung shanhtē du na ra ai danam de, shaloi jang du Wa ai.

22 Hpang shāni ē nawng wora hkran ē tsap nga mā ta ai shāwa māšha ni gaw, Ii lāngai sha hta kāga shāje li n nga ai hpe mu ma ai hte, Yēsu gaw dai li hta shi a sāpe ni hte rau n shang nang ai, sāpe ni hkrui shang ma ai hpe, dum ma ai:

23 (Rai ti mung, dai Madu shākawn ai hpang, shanhtē muk sha ai shāra a mākau de, Tiberi māre na Ii ni du ma ai:)

24 Dai rē ai mājaw dai kaw Yēsu mung, shi a sāpe ni mung, n nga mā sai hpe shāwa māšha ni chye mu yang, shanhtē mung dai li ni hta jawn nna, Yēsu hpe tam let kaperna-um māre de hkan du nang ma ai.

25 Shing rai dai nawng wora hkran ē shi hpe mu mu yang, shanhtē gaw, Rabai ē, nang nang de gāloī du nit ta? ngu nna san mu ai.

26 Yēsu gaw, Ngai nanhtē hpe gāja wa teng teng tsun mā de ga, Lāmik kumla mu myit dai mājaw, nanhtē ngai hpe tam ai n rai myit dai; muk lu sha nna hkru kat ai mājaw sha, tam ai rai nga myit dai.

27 Hten bya chyē ai lusha a mātu hkum shāja myit; Māšha Kāsha nanhtē hpe jaw lu ai htani htana asak a mātū, a grin nga ai lusha lu la na she shāja mu: kāning rai nme law, dai wa gaw, Kāwa Kārai Kāsang a dāzik kap ai wa rai nga ai, ngu nna htan mu ai.

28 Dai mājaw shanhtē gaw, Anhtē Kārai Kāsang a amu gun hpai na gaw, kāning di na rai ta? ngu nna shi hpe san mu yang,

29 Yēsu gaw, Kārai Kāsang a amu ngyai ai gaw, shi shāngun dat ai wa hpe

kam sham ai lam, ngu ai rai nga ai, ngu nna shanhtē hpe htan wu ai.

30 Dai rē ai mājaw shanhtē gaw, Anhtē mu lu nna nang hpe kam na gaw, nang hpa lāmik kumla mādun nga n ta? nang hpa māgam gun nga n ta?

31 Shi gaw shanhtē sha na mātu, sumsing lāmu de nna muk jaw mu ai, nga nna ka da nga ai hte māren, anhtē a ji wa ni gaw nam mali hkan ē manna muk lu sha ma ai, ngu nna shi hpe tsun mu ai.

32 Shāloī Yēsu gaw, Ngai nanhtē hpe gāja wa teng teng tsun mā de ga. Nanhtē hpe sumsing lāmu de na muk jaw ai gaw Mawshe n rai; nyē Wa she sumsing lāmu de na dai teng man ai muk nanhtē hpe jaw myit dai:

33 Kāning rai nme law, Kārai Kāsang a muk ngu ai gaw, sumsing lāmu na yu wa nna, mungkan ga hpe asak jaw ai hpe ngu ai, rai nga ai, ngu nna shanhtē hpe tsun mu ai.

34 Dai rai nna shanhtē gaw, Mādu ē, muk dai anhtē hpe gāloī mung a jaw nga mi, ngu mu ai.

35 Yēsu gaw, Asak muk gaw ngai rai nga nngai, ngai hpang de sa ai wa gaw kawsi hkrum na n rai, ngai hpe kam sham at wa mung, gāloī mung hpang kāra hkrum na n rai.

36 Rai ti mung, nanhtē gaw ngai hpe mu da ninglen n kam myit dai, ngu nna ngai nanhtē hpe tsun mā sā de ai.

37 Wa ē ngai hpe ap ya ai yawng māyawng htē gaw, ngai hpang de du na mā ra ai; ngai hpang de du sa ai wa hpe mung, gāja wa ngai n kānawng kau na nngai.

38 Kāning rai nme law, sumsing lāmu nna ngai yu sa ai gaw, nyē a myit hkan na ngu, yu sa nngai n rai; ngai hpe shāngun dat ai wa a myit hkan na she, yu sa ai rai nngai.

39 Ngai hpe shāngun dat ai wa a myit mung, ngai ē ap ya ai yawng

māyawng htē hta na. lāngai mi muk ngai n shāyet ai sha, hpang jāhtum na nhtoi hta shārawt Ia na, nga nna myit ai rai nga ai.

40 Hpa rai nga yang, Kāsha wa hpe mu nna, kam sham ai wa kādai mung, htani htana asak lu la na gaw, nyē Wa a myit ra ai hku rai nga ai: ngai mung hpang jāhtum na nhtoi hta, dai wa hpe shārawt na we ai, ngu nna shanhtē hpe tsun mu ai.

41 Dai rai nna Yēsu shi nan, Sumsing lāmu de na yu wa ai muk ngai rai nga nngai, nga ai mājaw, Yuda māšha ni shi a lam aput angun let,

42 Ndai wa gaw Yosep a kāsha Yēsu n rai ni? shi a kānu kāwa hpe anhtē chye gaw ai n rai ni? Dai rē ai mi, Ngai gaw sumsing lāmu de na yu wa nngai, nga nna kāning rai tsun lu a ta? nga ma ai.

43 Shāloī Yēsu gaw, Nanhtē shāda da hkum tsun angun myit:

44 Ngai hpe shāngun dat ai nyē Wa ē lau la ai wa n rai yang gaw, kādai mung ngai hpang de du sa lu na n rai; du sa ai wa hpe mung, hpang jāhtum na nhtoi hta ngai shārawt Ia na we ai.

45 Māšha yawng māyawng gaw Kārai Kāsang a shārin achyin ai lu la ai ni rai na ma ra ai, nga nna myihtoi laika ni hta ka da ai hte māren, nyē Wa kaw na mādat Ia nna, shārin achyin la ai ni yawng htē gaw, ngai hpang de du sa ma ai.

46 Shinggyim māšha lāngai mi ē me Wa hpe mu yu ai n rai; Kārai Kāsang kaw nna du sa ai wa chyu sha, Wa hpe mu yu nu ai.

47 Nanhtē hpe ngai gāja wa teng teng tsun mā de ga, Kam sham ai wa gaw htani htana asak lu la lu ai.

48 Ngai gaw asak muk rāi nga nngai.

49 Nanhtē a nji nwōi ni gaw nam māli hkan ē manna muk sha nna, si wa mā sai.

50 Ya na muk gaw, măsha wa sha nna n si u ga nga, sumsing lămu de na yu wa ai muk rai nga ai.

51 Ngai gaw sumsing lămu de na du yu wa ai, hkrung ai muk rai nga nngai: muk ndai sha ai wă kădai mung, htani htana a hkrung nga na ra ai: mungkan ga a asak hkrung nga na mătu, ngai jaw ai muk chyawm gaw, nyē a shan rai nga li ai, ngu nna shanhtē hpe htan mu ai.

52 Dai rē ai măjaw Yuda măsha ni, Ndai wa gaw, kăning di nna anhtē hpe shi a ashan jaw sha lu na a ta? nga nna shăda da tsun hkat ma ai.

53 Dai rai nna Yēsu gaw, Ngai nanhtē hpe găja wa teng teng tsun mă de ga, Măsha Kăsha a ashan nanhte n sha, shi a asai hpe mung n lu myit yang gaw, nanhtē hta asak n rawng lu ai.

54 Nyē a ashan sha nna, nye a asai lu ai wa gaw, htani htana asak lu la nu ai: dai wa hpe mung, hpang jăhtum na nhtoi hta ngai shărawt la na we ai:

55 Kăning rai nme law, nyē a ashan gaw teng man ai shahpa rai Ii ai; nyē a asai mung, teng man ai luhpia rai li ai.

56 Nyē a ashan sha nna, nyē a asai lu ai wa gaw, ngai hta rawng nga ai; dai wa hta mung ngai rawng nga nngai.

57 A hkrung nga ai nyē Wa gaw, ngai hpe shăngun dat ai rai nna, ngai gaw Wa a măjaw hkrung nga nngai hte măren, ngai hpe sha ai wa mung, nyē a măjaw hkrung nga na ra ai.

58 Da ndai gaw sumsing lămu de nna du yu wa ai muk rai nga ai: nji nwā ni sha nna si wa ai muk zawn n rai: ndai muk sha ai wa gaw, htani htana a hkrung nga na ra ai, ngu nna shanhtē hpe tsun mu ai.

59 Ndai gaw, Kaperna-um măre na tăra jawng hta, shi shărin shăga nga yang, tsun ai ga rai lu ai.

60 Dai rē ai măjaw shi a săpe ni law law wa dai ga na jang, Ga ndai gaw yak

la ai ga rai nga ai, kădai wa mădat lu na i? nga ma ai.

61 Shing nga nna shi a săpe ni tsun gunung nga ma ai hpe, Yēsu shi a myit hta chyē wu ai măjaw, shi shanhtē hpe, Ga ndai gaw nanhtē hpe myit hten shăngun wa să ni?

62 Dai Măsha Kăsha, myi nga ai shăra de bai lung wa ai hpe nanhtē mu myit yang gaw, kăning nga na myit ta?

63 Asak jăhkrun ai gaw Wenyi rai nga ai; hkum shan gaw hpa lam mung n la ai: ngai nanhtē hpe tsun ai mung ga gaw, Wenyi rai nga ai, asak mung rai nga ai.

64 Rai ti mung nanhtē hta na nkau mi gaw n kam n sham myit dai, ngu mu ai. Kăning rai nme law, Yēsu gaw, n kam n sham ai ni kădai rai ma ai mung, shi hpe ap kau na wa kădai rē ai mung, shawng nna chyē da nga ai.

65 Dai rai nna shi gaw, Dai lam măjaw she, nyē Wa a ahkang hte n rai yang gaw, kădai mung ngai hpang de n du n sa lu ai, ngu nna ngai nanhtē hpe tsun mă să de ai, ngu mu ai.

66 Dai nga ai măjaw shi a săpe ni law law wa nhtang mat wa nna, shi kaw bai n hkan nang ma sai.

67 Dai rai nna Yēsu gaw săpe shi lăhkawng htē hpe, Nanhtē mung wa mat măyu myit ni? ngu nna san mu ai.

68 Shăloï Simun Petru gaw, Anhtē kădai hpang de wa na rai nga a ta? nang gaw htani htana asak hte seng ai mungga lu ndai:

69 Nang gaw Kărai Kăsang a Chyoï pra ai wa rai nga ndai hpe, anhtē kam sham să ga ai rai nna, chyē nga ga ai, ngu nna shi hpe htan wu ai.

70 Bai Yēsu gaw, Nanhtē shi lăhkawng hpe ngai lăta Ia mă să de ai, n rai ni? rai ti mung, nanhtē hta na lăngai mi gaw nat mătse rai nga ai, ngu nna shanhtē hpe htan mu ai.

71 Shing nga ai gaw, Simun Iskarut a kăsha Yuda hpe shăang nna tsun ai rai nga ai: kăning rai nme law, dai wa gaw shi hpe ap kau na wa rai nga ai hte, săpe shi lăhkawng hta mung lawm nga ai.

## 7

Dai hpang Yēsu gaw Galile mung hkan ē jawt hkawm nga ai: Yuda măsha ni shi hpe sat kau na tam ma ai măjaw, Yuda mung ē n hkawm măyu wu ai.

2 Dai shăloï ē Yuda măsha ni a Sum poi, ngu ai poi, du ra ai rai nna, shi a kănau ni gaw,

3 Nang gălaw ai amu a lam ni hpe na a săpe ni mung mu lu mu ga, ndai mung na pru nna, Yuda mung de sa wa su:

4 Kăjai gumhkawng na hpe ai wa gaw, măkoj măgap rai nna hpa mung n gălaw ga ai. Nang ndai amu lam gălaw ndai rai yang gaw, mungkan ga ē na a hkum shădan dan u, ngu nna shi hpe tsun mu ai.

5 Kăning rai nme law, shi a kănau ni pyi shi hpe n kam n sham ma ai.

6 Dai rē ai măjaw Yēsu gaw shanhtē hpe, Nyē a ahkying gărai n du li ai; nanhtē a ahkying chyawm gaw, tut nawng a rai nga ai.

7 Mungkan ga gaw nanhtē hpe n dawng n wawm rai lu ai n rai; ngai hpe n dawng n wawm nga ai: kăning rai nme law, de a arawn alai n shawp ai hpe, ngai sakse hkam nngai măjaw rai nga ai.

8 Dai poi de nanhtē lung wa mu: ngai chyawm gaw ndai poi hta gărai n lung na nngai: kăning rai nme law, nyē a ahkying gărai n du li ai,

9 Nga nna shanhtē hpe tsun dat nhtawm, shi gaw Galile mung ē nawhti nga ai.

10 Rai ti mung, kănau ni dai poi de lung mat wa ai hpang, shi mung, dan

dan n rē ai sha măyun nna sa ai zawn, lung wa wu ai.

11 Dai măjaw Yuda măsha ni gaw dai poi hta shi hpe tam nna, Dai wa kănang rai nga a ta? nga ma ai.

12 Shăwa măsha ni hta mung shi a lam wu wu di di law nga ai hte, nkau mi gaw, Shi gaw măsha kăja rai nga ai, nga ma ai; bai nkau mi gaw, N rai, mung măsha ni hpe woi shădam ai wa rai nga ai, nga shăjang ma ai.

13 Rai ti mung, Yuda măsha ni hpe hkrit ai măjaw, kădai mung shi a lam leng leng n tsun ma ai.

14 Ya dai poi nhtoi a kăang hkup rai wa jang, Yēsu gaw naw ku Htingnu de lung nna shărin shăga nga ai.

15 Dai rē ai măjaw Yuda măsha ni gaw mau ai hte, Ndai wa gaw n shărin yu ai mi, laika kăning rai chyē lu ai ga i? nga ma ai.

16 Dai măjaw Yēsu gaw, Ngai shărin shăga ai ga gaw nyē a ga n rai, ngai hpe shăngun dat ai wa a ga rai nga ai:

17 Dai Wa a myit hkan măyu ai wa rai yang gaw, shărin shăga ai ga ndai, Kărai Kăsang kaw na rē ai, shing n rai, nyē a myit hte tsun nga ai ga rē ai, chyē ginhka lu na wu ai.

18 Tinang a myit hte tsun ai wa gaw, tinang a arawng sădang tam ai rai nga ai: tinang hpe shăngun dat ai wa a arawng sădang tam ai wa chyawm gaw, teng man nga ai rai nna, shi hta n ding n man ai n rawng lu ai.

19 Mawshe gaw nanhtē hpe jep ai tăra jaw da sai, n rai ni? rai ti mung, nanhtē hta na kădai mung, dai tăra n hkan myit dai. Ngai hpe sat kau na hpa rai tam myit ta? ngu nna shanhtē hpe htan mu ai.

20 Shăloï hpawng nga ai măsha ni gaw, Nang hta nat rawng nga ai: nang hpe sat kau na kădai tam a ta? ngu nna htan mu ai.

21 Yēsu gaw, Ngai amu lāngai mi gālaw se ai rai nna, nanhtē yawng mau ma nit dai.

22 Mātu gādoi ai lam gaw Mawshe kaw nna n rai, jī wa ni kaw nna she, Mawshe nanhtē hpe, dai tāra jaw da myit dai rai nna, lāban nhtoi hta pyi nanhtē māsha hpe mātu gādoi ai lam jaw myit dai:

23 Shing rai Mawshe a tāra n hten lu hkra, māsha Wa lāban nhtoi ē mātu gādoi hkam la lu āi rē ai mi, lāban nhtoi hta māsha hkum ting hpe shāmai ya ai mājaw, nanhtē ngai hpe pawt bu nga myit ni?

24 Myi man tau nna hkum jēyang myit, ding man ai hku she jēyang mu; ngu nna shanhtē hpe htan mu ai.

25 Dai rē ai mājaw Yerusalem mare na māsha nkau mi gaw, Sat kau na tam ai gaw, ndai wa hpe n rai ni?

26 Yu mu, shi dan dan leng leng hkaw tsun nga nna, shi hpe mung hpa n ngu mu hka: ndai wa nan Hkristu rai nga ai gaw, du ni gāja wa chye ma nu ai kun?

27 Rai ti mung, ndai wa kānang na rē ai gaw anhtē chyē ga ai; Hkristu du sa yang chyawm gaw, kānang na dan pru na gaw, kādai chye ai n rai, nga ma ai.

28 Dai rē ai: mājaw Yēsu gaw naw ku Htingnu ē shārin shāga nga yang, Nanhtē ngai hpe chyē nga myit dai; ngai kānang na rē ai mung chye myit dai: ngai gaw nyē a myit hte du sa nngai n rai; rai ti mung ngai hpe shāngun dat ai, nanhtē n chyē ai wa gaw, teng man nga ai.

29 Dai wa gaw ngai hpe shāngun dat nngai rai nna, shi kaw na ngai du sa nngai mājaw, ngai shi hpe chyē we ai, ngu nna jāhtau wu ai.

30 Dai rai nna shanhtē gaw shi hpe rim la na maw ma ai; rai ti mung, shi a ahkying gārai n du lu ai mājaw, gāde ai muk shi hpe n rim lu mu ai.

31 Hpawng nga ai māsha ni hta chyawm gaw, shi hpe kam sham ai ni law law wa rai nga ma ai rai nna, Hkristu du sa yang ri, ndai wa gālaw ai hta, grau ai lāmik kumla dan lu na a ni? nga nna tsun shājang ma ai.

32 Hpawng nga ai māsha ni gaw, shi a mājaw shing nga tsun wu ma ai hpe, Hparishe ni na ma yang, hkinjawng agyi ni hte Hparishe ni gaw, shi hpe rim la na mātu, hpyen du ni hpe shāngun dat ma ai.

33 Dai rē ai mājaw Yēsu gaw, Ngai nanhtē hte rau tawng mārang mi sha naw nga nna, ngai hpe shāngun dat ai wa hpang de Wa mat na nngai:

34 Shāloi nanhtē ngai hpe tam ti mung, mu na myit dai n rai: ngai nga ai shāra de mung nanhtē n du lu na myit dai, ngu mu ai.

35 Dai mājaw Yuda māsha ni gaw, Anhtē n mu tam lu hkra, ndai wa gaw gāde sa wa na ra ai i? Heleni māsha ni hta bra nga ai ni hpang de sa nna, Heleni rnāsha ni hpe shārin shāga na wu ai kun?

36 Nanhtē ngai hpe tam ti mung n mu na myit dai; ngai nga ai shāra de mung nanhtē n du lu na myit dai, nga ai ga gaw hpa nga ai ga rai lu ai i? nga nna shāda da tsun ma ai.

37 Shāloi dai poi a jāhtum nhtoi ngu ai nhtoi kāba hta Yēsu gaw tsap da nna, Hpang kāra ai wa nga yang gaw, ngai hpang de sa lu rit.

38 Ngai hpe kam sham ai wa gaw, Chyum laika hta tsun ai hte māren, dai wa a kraw lāwang hta na asak hkruning ai ntsin a hka nu lāwi pru nga na ra ai, ngu nna jāhtau tsun wu ai.

39 Shing nga ai gaw, shi hpe kam sham ai ni lu la na Weni hpe, shāang nna tsun ai rai nga ai: kānang rai nme law, Yēsu gaw shi a hpung shingkang gārai n dan hkung ai mājaw, Wenyi gārai n jaw wu ai.

40 Shing nga ai ga na ma yang, hpawng nga ai ni hta na nkau mi gaw, Ndai wa gaw gāja wa dai myihtoi rai nga ai:

41 Nkau mi mung, Ndai wa gaw Hkristu nan rai nga ai, nga ma ai. Rai ti mung, nkau mi gaw, Ataw! Hkristu wa mi Galile mung na pru na a ni?

42 Hkristu gaw Dawi a lākung hta na prat wa nna, Dawi a shāra ngu ai Betlehem kāhtawng na she, paw pru na rē ai, nga nna Chyum laika hta rawng ai, n rai ni? nga hkat ma ai.

43 Dai rai nna hpawng nga ai māsha ni hta, shi a mājaw bra wa shāra rawng wa ma lu ai.

44 Shanhtē hta na nkau mi gaw shi hpe rim la māyu ma ti mung, kādai wa mung shi hpe n rim lu mu ai.

45 Dai rē ai mājaw hpyen bu ni, hkinjawng agyi ni hte Hparishe ni hpang de bai du wa ma yang, dai ni gaw, Dai wa hpe hpa rai n woi wa myit ta? ngu nna hkap san mu yang, hpyen bu ni gaw,

46 Wora wa zawn nga nna shārin shāga ai kādai mung n nga yu ai, ngu nna htan mu ai.

47 Shāloi Hparishe ni gaw, Nanhtē hpe wa mung lau kau lu mā nit ni?

48 Du agyi ni hta na mung, Hparishe ni hta na mung, dai wa hpe kam sham ai kādai nga a ta?

49 Tāra n chyē ai, ndai shāwa hpawng chyawm gaw, dāgam dāla hkrum sha ai ni rai nga ma ai, ngu nna shanhtē hpe htan mu ai.

50 Shanhtē hta lawm ai, shawng de Yēsu kaw sa ai wa Nikodi chyawm gaw,

51 Anhtē a tāra gaw māsha hpe, shi hkum nan e n san yu ai mi, shi gālaw ai lam gārai n chyē yang, daw dan ga a ni? ngu nna shanhtē hpe san mu ai.

52 Shanhtē gaw, Nang mung Galile māsha rai nga n ni? Galile mung de na kādai myihtoi mung n paw pru yu ai,

nang she gawn yu u, ngu nna shi hpe htan mu ai.

53 (Shāloi shanhtē lāngai hte lāngai tinang a nta de wa mat ma ai:

## 8

Yēsu chyawm gaw Tsanlun bum de pru mat wa ai.

2 Bai jāhpawt jau jau ē naw ku Htingnu de shi sa wa ai rai nna, māsha nlāng htē shi kaw sa ma ai; shi dung let shanhtē hpe shārin shāga nga ai.

3 Shāloi laika ka ai sāra ni hte Hparishe ni gaw, shut hpyit nga ai māsha num lāngai mi hpe dun sa nna, kāng ē shātsap tawn dā nhtawm,

4 Sāra ē, ndai numsha hpe shut hpyit nga yang, mu hkrup sā gaw ai:

5 Ndai zawn rē ai numsha hpe, nlung hte kābai sat kau lu na rē ai, nga nna Mawshe gaw jep ai tāra hta anhtē hpe mātsun jaw da ma ni ai: ya nang gaw kāning ngu na wu ta? ngu nna shi hpe san mu ai.

6 Shing nga san ai gaw, shi hta māra shāngun na lam mu lu hkra, shi hpe chyam dinglik yu ai rai nga ai. Yesu chyawm gaw ga de gum nna, ga hta layung hte ka nna nga nga ai.

7 Shanhtē shing nga bai kāhtap san san rai ma ai mājaw, shi rawt māda yu nna, Nanhtē hta na māra n lu ai Wa, shi hpe shawng nlung hte kābai mu, ngu nna shanhtē hpe tsun mu ai.

8 Shing nga ngut jang shi bai gum nna, ga hta ka nga ai.

9 Shanhtē dai ga na jang, agyi sālang ni shawng pru wa kaw nna, lāngai hte lāngai pru mat wa ma ai: shingrai Yēsu hkrai sha hti nga ai hte, dai, numsha mung myi na shāra ē a nga nga ai.

10 Shāloi Yēsu bai rawt māda yu nna, Numsha ē, ya shanhtē kānang rai wa ma sā ta? nang hpe gāde ai muk n jēyang a ni? ngu nna shi hpe san wu yang,

11 Numsha gaw, Mādu ē, găde ai muk n jēyang nngai, ngu nna htan wu ai. Shăloī Yēsu gaw, Ngai mung nang hpe n jēyang na nngai: wa nu; ya kaw nna yubak hkum gălaw nit, ngu nna tsun dat wu ai.)

12 Dai rē ai măjaw Yesu shanhtē hpe bai tsun mu ai gaw, Ngai gaw mungkan ga a nhtoi rai nga nngai: nyē a hpang hkan nang ai wă gaw, nsin hta n hkawm n sa lu na rai nna, asak a nhtoi lu la na ra ai, ngu mu ai.

13 Dai rai nna Hparishe ni gaw, Nang dai na a lam sakse hkam ndai rai nna, na a sakse gaw n teng nga lit dai, ngu nna shi hpe tsun mu ai.

14 Shăloī Yēsu gaw, Ngai dai nyē a lam sakse hkam yang pyi, nyē a sakse teng nga li ai: ngai kănang na pru sa nna, găde rai wa na mung, ngai chyē nngai: nanhtē chyawm gaw, ngai kănang na pru sa nna, găde rai wa na mung n chyē myit dai.

15 Nanhtē gaw hkum shan lam hku sha daw dan myit dai; ngai gaw kădai hpe mung n daw dan nngai.

16 Găja wa daw dan nngai rai yang mung, ngai daw dan ai hku teng man li ai: kăning rai nme law, ngai gaw lăngai sha rai nga nngai n rai; ngai mung, ngai hpe shăngun dat ai, nyē Wa mung, rai nga ga ai.

17 Rai sa, sakse lăhkawng a ga gaw teng man nga ai, nga nna nanhtē a tăra hta ka da nga ai.

18 Ngai gaw tinang dai sakse hkam ya ai wa rai nga nngai: ngai hpe shăngun dat ai, nyē a Wa mung, nyē a lam sakse hkam ya ai wa rai nga ai, ngu nna shanhtē hpe htan mu ai.

19 Dai rai nna shanhtē gaw, Na Nwa gaw kănang nga lit ta? ngu nna shi hpe san mu ai. Yēsu gaw, Nanhtē ngai hpe mung, nyē Wa hpe mung, n chyē myit dai: ngai hpe chye myit taw gaw, nyē

Wa hpe mung, chye na mă nit dai, ngu nna bai htan mu ai.

20 Ga ndai gaw naw ku Htingnu ē shărin shăga nga yang, alu gawk ē tsun ai ga rai nga ai: shi a ahkying gărai n du lu ai măjaw, shi hpe găde ai muk n rim lu mu ai.

21 Dai rē ai măjaw shi shanhtē hpe bai tsun mu ai gaw, Ngai wa mat na nngai, shăloī nanhtē ngai hpe tam na ma rin dai; tinang a yubak hta mung, nanhtē si na myit dai: ngai wa ai shăra de mung, nanhtē n du lu na myit dai, ngu mu ai.

22 Dai măjaw Yuda măsha ni gaw, Ngai wa ai shăra de nanhtē n du lu na myit dai. nga nna shi tsun ai gaw, shi hkum dai sat na wu ai kun? nga ma ai.

23 Shăloī shi gaw, Nanhtē lăwu tsang na rai nga myit dai; ngai chyawm gaw lăhta tang na rai nga nngai: nanhtē gaw ndai mungkan ga na rai myit dai; ngai chyawm gaw ndai mungkan ga na n rai nngai.

24 Dai măjaw, nanhtē gaw tinang a yubak hta si na mă rin dai, ngu nna ngai nanhtē hpe tsun ni ai: kăning rai nme law, ngai dai wa rai nga nngai hpe, nanhtē n kam myit yang gaw, nanhtē tinang a yubak hta si na myit dai, ngu mu ai.

25 Dai nga ai măjaw shanhtē gaw, Nang kădai rai nga n ta? ngu nna shi hpe san mu ai. Yēsu gaw, Shawngshawng de nna ngai nanhtē hpe a tsun nga nngai hte măren, ngai wa rai nga nngai.

26 Ngai hta nanhtē a lam tsun hăparan shăra hte jēyang shăra law law nga ai: rai ti mung, ngai hpe shăngun dat ai wa gaw, teng man nga ai rai nna, shi kaw na ngai na la măla hpe mungkan ga hpe ngai tsun dan we ai, ngu mu ai.

27 Kăwa a lam shăang nna shi shanhtē hpe tsun nga ai gaw, shanhtē n chyē na ma ai.

28 Dai măjaw Yēsu gaw, Dai Măsha Kăsha hpe nanhtē shărawt da ai shăloī she, ngai gaw dai wa rai nga nngai mung, ngai gaw nyē myit hte hpe mung n gălaw ai sha, nye Wa ngai hpe shărin nngai hte măren, dai ga ngai tsun nga nngai mung, nanhtē chyē na ma rin dai.

29 Ngai hpe shăngun dat ai wa gaw ngai hte rau a nga nga ai; ngai hkrai sha nga u ga, nga nna shi ngai hpe n jăhti kau nngai: kăning rai nme law, shi shărawng awng ai amu hpe, ngai tut nawng ē a gălaw nga nngai, ngu mu ai.

30 Dai ga tsun nga yang, măsha law law wa shi hpe kam sham ma ai.

31 Dai rē ai măjaw Yēsu gaw shi hpe kam sham ai Yuda măsha ni hpe, Nanhtē nyē a ga hta a grin nga myit yang gaw, nyē a săpe teng teng nanhtē rai nga myit dai:

32 Teng man ai lam mung nanhtē chye lu na ma rin dai rai nna, dai teng man ai gaw, nanhtē hpe shălawt dat na rai ai, ngu nna tsun mu ai.

33 Shăloī shan htē gaw, Anhtē Abraham a amyu rai ga ai rai nna, kădai kaw lang mi muk n yam yu ga ai: dai she rai yang, Shălawt dat na myit dai, nga nna nang kăning rai tsun lu n ta? ngu nna san mu ai.

34 Yēsu gaw, Ngai nanhtē hpe găja wa teng teng tsun ma de ga, Yubak gălaw ai wa kădai mung, yubak a măyam rai nga ai.

35 Măyam ngu ai gaw, nta ē tut nawng a nga lu ai n rai: kăsha chyawm găw tut nawng a nga lu ai.

36 Dai rē ai măjaw Kăsha wa ē nanhtē hpe shălawt dat myit yang gaw, nanhtē găja wa teng teng lawt lu na myit dai.

37 Namhtē Abraham a amyu rai myit dai gaw, ngai chyē nga nngai: rai ti mung,

nyē a ga nanhtē hta n rawng nga ma lit dai măjaw, ngai hpe sat kau na nanhtē tam nga myit dai.

38 Ngai gaw nye Wa kaw na mu la ai hte măren, tsun nga nngai: nanhtē mung nanhtē a kăwa kaw na, na la ai hte măren, gălaw nga myit dai, ngu nna shanhtē hpe htan mu ai.

39 Shăloī shanhtē mung, Abraham gaw anhtē a Wa rai nga mă li ai, ngu nna shi hpe htan mu ai. Yēsu gaw, Nanhtē Abraham a kăsha rai myit yang gaw, Abraham a lăilen hku nanhtē hkan gălaw na myit dai.

40 Ya gaw, nanhtē hpe Kărai Kăsang kaw na, na la ai teng man ai lam tsun dan ai wa, ngu ai ngai hpe, nanhtē sat kau na tam myit dai: Abraham gaw dai zawn rē ai n rai.

41 Nanhtē gaw nanhtē a kăwa a lăilen hku hkan gălaw myit dai, ngu nna tsun mu ai. Shamhtē gaw, Anhtē n-gyi amyu n rai ga ai. Kărai Kăsang ngu ai, anhtē a Wa lăngai sha rai ma li ai, ngu nna shi hpe tsun mu ai.

42 Shăloī Yēsu gaw, Kărai Kăsang nanhtē a Kăwa rai mă lit yang gaw, nanhtē ngai hpe tsaw ra na myit dai: kăning rai nme law, ngai gaw Kărai Kăsang kaw na pru nna du sa nngai: nyē a myit hte ngai du sa nngai n rai, shi gaw ngai hpe shăngun dat nngai.

43 Ngai tsun ai lam nanhtē hpa rai n chyē na myit ta? Nyē a ga n mădat la lu ai măjaw, rai nga myit dai.

44 Nanhtē gaw, nanhtē a kăwa ngu ai, gumlau Nat hta na prat wa ai ni rai nga myit dai rai nna, nanhtē a kăwa a kăyat ai hku mung, hkan măyu myit dai: shi gaw shawng npawt kaw nna, măsha sat ai wa rai nga ai rai nna, shi hta teng man ai lam n rawng lu ai măjaw, teng man ai lam hta n nga lu ai: shi măsu măgaw ga tsun yang, shi a myit hta na hte măren tsun nga ai: shi

gaw măsu ai wa rai nga ai hte, măsu măgaw ai a kăwa mung, rai nga ai.

45 Ngai teng man ai lam tsun nngai măjaw, nanhtē n kam n sham myit dai.

46 Ngai hta ra rawng ai gaw, nanhtē hta na kădai mădun lu na myit ta? teng man ai lam she ngai tsun ai rai yang gaw, hpa rai nanhtē n kam myit ta?

47 Kărai Kăsang hte seng ai wa gaw, Kărai Kăsang a ga mădat nga ai; nanhtē gaw Kărai Kăsang hte n seng ai măjaw, n mădat myit dai, ngu nna shanhtē hpe tsun mu ai.

48 Shăloï Yuda măsha ni gaw, Nang Samari măsha rai ndai, nat shang ai wa mung rai ndai, ngu nna anhtē tsun ai ga gaw, jaw la nga ai n rai ni? ngu nna shi hpe bai htan mu ai.

49 Yësu gaw, Ngai nat shang ai wa n rai nngai: nyē Wa hpe she ngai hkungga nngai, nanhtē chyawm gaw ngai e jăhpoi myit dai.

50 Rai ti mung ngăi gaw nyē a arawng sădang n tam nngai; tam ya ai wa hte jĕyang ya ai wa lăngai mi rai nga ai.

51 Nanhtē hpe ngai găja wa teng teng tsun mă de ga, Nyē ga hku hkan ai wa gaw găloï mung n si na ra ai, ngu nna bai htan mu ai.

52 Bai Yuda măsha ni gaw, Nang nat shang ai wa rai nga ai gaw, ya anhtē chyē să ga ai: Abraham hte myihtoi ni pyi si mat wa ma sai; nang wa chyawm gaw, Nyē ga hku hkan ai wa gaw, găloï mung n si na ra ai, nga nna tsun lu ndai.

53 Nang wa mi, si mat wa sai, anhtē a Wa Abraham hta grau kăba nga n ni? myihtoi ni mung si mat wa mă sai; nang gaw kădai wa tai nga n ta? ngu nna shi hpe tsun mu ai.

54 Yësu gaw, Nyē hkum hpe ngai shăgrau nngai rai yang gaw, nyē a arawng hpa n tai li ai; ngai e shăgrau ai

wa gaw, nyē Wa rai nga ai: dai wa hpe nanhtē a Kărai Kăsang rē ai, nga nna nanhtē tsun myit dai;

55 Rai ti mung nanhtē shi hpe n chyē myit dai, ngai chyawm gaw chyē nga nngai. N chyē nngai, ngu yang gaw, nanhtē zawn măsu ai wa ngai rai na ra ai: ngai chyawm gaw shi hpe chyē nga nngai rai nna, shi a ga hpe mung hkan nga nngai.

56 Nanhtē a kăwa Abraham gaw nyē a nhtoi mu lu na hpe, shărawng awng nga ai rai nna, mu lu ai hte kăbu găra nga ai, ngu nna htan mu ai.

57 Dai rē ai măjaw Yuda măsha ni gaw, Nang gaw asak mănga shi ning pyi gărai n du ai mi, Abraham hpe mu yu nu ni? ngu nna shi hpe tsun mu ai.

58 Shăloï Yësu gaw, Nanhtē hpe ngai găja wa teng teng tsun mă de ga, Abraham gărai n nga yang nna ngai nga ni ai, ngu nna shanhtē hpe tsun mu ai.

59 Dai rai nna shanhtē gaw shi hpe kăbai na nga nna, lungdin hta ma ai: Yësu chyawm gaw măkoi mat nna, naw ku Htingnu na pru mat wa ai.

## 9

**Y**a shi Iai sa wa nga yang, hkritung nna myi kyaw ai wa lăngai mi hpe mu wu ai.

2 Shăloï shi a săpe ni gaw, Rabai ē, ndai wa myi n mu ai shăngai wa ai gaw, yubak gălaw ai kădai wa rai ta? ndai wa rai ni? kănu yan kăwa rai ni? ngu nna san mu ai.

3 Yësu gaw, Ndai wa yubak gălaw ai n rai, kănu yan kăwa mung n rai; shi hta Kărai Kăsang a măgam amu dan hkung na mătu, rai nga. ai.

4 Ngai hpē shăngun dat ai wa a măgam amu hpe, shăni nhtoi naw rai nga yang, anhtē gun hpai lu na rai nga ai: kădai muk amu n gun n hpai lu ai shăna ahkying du na ra ai.

5 Ngai gaw mungkan ga ē naw nga ni hté yang, mungkan ga a nhtoi ngai rai nga nngai, ngu nna htan mu ai.

6 Shing nga tsun ngut jang, shi gaw ga hta măyen prat bang nna, hkumpup gălaw la nhtawm, dai wa a myi hta chya ya nna,

7 Silum hka lawng de sa kăshin su, ngu nna shi hpe tsun dat wu ai: dai hte măren shi sa kăshin nna, myi mu ai hte bai wa ai: (Silum ngu ai gaw, shăngun dat ngu ai. rai nga ai).

8 Dai rai nna htungbu ni hte, shawng de shi hpyi sha ai wa rē ai mu ga ai ni gaw, Ndai wa gaw, dung nga nna hpyi sha ai wa n rai ni? ngu ma ai.

9 Nkau mi gaw, Dai wa nan rē ai, nga ma ai. Bai nkau mi gaw, Dai wa n rai, dai wa hte gaw bung ai, nga ma ai. Dai wa chyawm gaw, Ngai nan dai wa rai nngai, ngu nna tsun wu ai.

10 Shăloï dai ni gaw, Rai taw, na a myi kăning rai mu lu lit ta? ngu nna shi hpe san mu ai.

11 Shi gaw, Yësu ngu ai wa hkumpup gălaw la nna. nyē a myi hta chya ya nhtawm, Silum hka lawng de sa kăshin u, nga ai hte măren ngai sa kăshin we yang, myi mu lu li ai, ngu nna htan mu ai.

12 Shăloï shanhtē gaw, Dai wa kănang nga nga a ta? ngu nna bai san mu yang, Shi gaw, Ngai n chyē nngai, ngu nna bai htan wu ai.

13 Shanhtē gaw, shawng de myi n mu ai wa hpe Hparishe ni hpang de woi sa mu ai:

14 Yësu hkumpup gălaw la nna, dai wa a myi hpaw ya ai shăni gaw, lăban nhtoi rai nga ai.

15 Bai Hparishe ni mung, dai wa hpe, shi a myi kăning rai mu lu ai lam san mu yang, dai wa gaw, Nyē a myi hta shi hkumpup bang ya nna, ngai kăshin kau dat we yang mu wa li ai, ngu nna shanhtē hpe htan mu ai.

16 Shăloï Hparishe ni nkau mi gaw, Dai wa gaw lăban nhtoi n gawn ai măjaw, Kărai Kăsang kaw na du sa ai wa n rai, nga ma ai: bai nkau mi gaw, Yubak lu ai măsha gaw, ning rē ai lămkik kumla kăning rai gălaw lu na a ta? nga ma ai. Shing nga nna shăda da bra mat ma ai.

17 Dai rai nna shanhtē gaw myi n mu ai wa hpe, Na a myi hpaw ya ai măjaw, shi a lam nang kăning ngu da wu ta? ngu nna bai san mu yang, shi gaw, Dai wa gaw myihtoi rai nga ai, ngu nna bai htan mu ai.

18 Yuda măsha ni gaw myi mu ai wa a kănu yan kăwa hpe shăga nna, Ndai wa gaw hkritung nna myi kyaw ai, nga ai, nan a kăsha rai ma lit ni? dai rai yang, ya kăning rai mu lu lu ta?

19 Nga nna shan hpe gărai n san yang, dai wa shawng de myi n mu ai, ya she mu ai hpe, n kam ma ai.

20 Dai wa a kănu yan kăwa mung, Ndai gaw an a kăsha rai nga ai, hkritung nna myi n mu ai mung rai nga ai, an chyē nga ga ai:

21 Rai ti mung, ya kăning rai mu lu ai; an n chyē gaw ai, găde ai shi a myi hpaw ya ai mung, n chyē ga ai: shi hpe san yu mu; shi asak mung kăba sai, shi a lam gaw shi tsun na ra ai, ngu nna htan mu ai.

22 Shi a kănu yan kăwa gaw Yuda măsha ni hpe hkrit ma ai măjaw, shing ngu tsun mu ai: kăning rai nme nga yang, Yësu gaw Hkristu rē ai, nga nna yin la ai wa kădai hpe rai ti mung, tăra jawng na shăpraw kau na, nga nna Yuda măsha ni ya nna pyi bawng hkut da mă sai.

23 Dai măjaw dai wa a kănu yan kăwa gaw, Shi asak kăba sai, shi hpe san yu mu, ngu mu ai.

24 Dai rē ai măjaw shanhtē gaw dai myi n mu ai wa hpe lang mi bai shăga

nna, Kārai Kāsang hpe shāgrau u; dai wa gaw yubak kap ai wa rai nga ai anhtē chyē ga ai, ngu nna shi hpe tsun mu ai.

25 Shāloī dai wa gaw, Shi yubak kap ai wa rē ai n rē ai, ngai n chyē nngai: ngai shawng shawng de myi n mu ai, ya chyawm gaw mu lu ni ai, dai lam lāngai sha ngai chyē nngai, ngu nna shanhtē hpe htan mu ai.

26 Bai shanhtē gaw. Shi nang hpe kāning di a ta? na myi kāning di jāhpaw ya a ta? ngu nna san mu ai.

27 Dai wa gaw, Ya sha mung ngai nanhtē hpe tsun ni ai, nanhtē she n na myit dai; hpa rai bai na māyu myit ta? nanhtē mung shi a sape tai māyu myit ni? ngu nna shanhtē hpe bai htan wu ai.

28 Shāloī shanhtē gaw shi hpe jāhpoi asawng let, Nang chyawm shi a sāpe rai nga ndai, anhtē gaw Mawshe a sāpe ni rai nga ga ai:

29 Kārai Kāsang gaw Mawshe hpe mung ga jaw ai anhtē chyē ga ai; dai wa kānang na rē ai gaw, anhtē n chyē ga ai, ngu mu ai.

30 Shāloī dai wa gaw, Nyē a mi shi hpaw ya lu nga ti mung, shi kānang na rē ai hpe nanhtē n chyē ai gaw, mauhpa lam rai nga ai.

31 Yubak kap ai ni a ga Kārai Kāsang n mādat nge ai gaw, anhtē chyē ga ai: Kārai Kāsang hpe naw ku hkungga nna, shi a myit hkan ai wa rai yang gaw, dai wa a ga mādat ya nga ai.

32 Hkritung nna myi kyaw ai wa a myi hpe, gāde ai hpaw ya lu ai nga ai mung, lāmu ga lat kaw nna gāloī mung n na yu ai.

33 Dai wa Kārai Kasang kaw na n rai yang gaw, hpa mung gālaw lu na n rai, ngu nna shanhtē hpe htan mu ai.

34 Shāloī shanhtē gaw, Nang wa mi hkum ting yubak hta na shāngai wa da nhtawm me, anhtē hpe shārin nga n ni?

ngu nna jawm htan nhtawm, dai wa hpe kānawng shāpraw kau mu ai.

35 Dai wa hpe shāpraw kau ai lam Yēsu na wu ai rai nna, shi hpe mu tam jang, Māsha Kāsha hpe nang kam sham nga n ni? ngu nna san wu ai.

36 Dai wa gaw, Mādu ē ngai kam sham lu na, Māsha Kāsha gaw kādai wa rai ta? ngu nna htan wu yang,

37 Yēsu gaw, Dai wa hpe nang mu yu nit dai hta n-ga, ya nang hte shāga ai wa gaw, dai wa nan rai nga ai, ngu nna shi hpe tsun wu ai.

38 Shāloī dai wa gaw, Mādu ē, ngai kam sham nga nngai, nga nna shi hpe naw ku wu ai.

39 Bai Yēsu gaw, myi n mu ai ni myi mu lu na mātu mung, mu nga ai ni n mu lu na mātu mung, mungkan, ga a tāra dāra ai lam tai na ngai sa du nngai, ngu wu ai.

40 Shi kaw nga ai Hparishe ni dai ga na ma yang, Rai taw, anhtē mung myi n mu ga ni? ngu nna shi hpe san mu ai.

41 Yēsu gaw, Nanhte myi n mu myit taw gaw, yubak n nga na myit dai: ya gaw, Anhtē myi mu ga ai, nga nga myit dai: de a mājaw nanhtē hta yubak māra na wu ai.

## 10

**N**gai nanhtē hpe gāja wa teng teng tsun mā de ai gaw, Sāgu lawng de chyinhka lam hku n shang ai, kāga nna shingtawt shang ai wa gaw, lāgut, dāmya rai nga ai.

2 Chyinhka lam hku shang ai wa chyawm gaw, sāgu ni hpe rem ai wa rai nga ai.

3 Chyinhka sin ai wa mung, dai wa hpe gaw hpaw ya ga ai; sāgu ni mung shi a nsen mādat ma ai rai nna, shi gaw tinang a sāgu ni hpe amying hte shāga nna, shinggan de woi shāpraw praw di wu ai.

4 Shi a sāgu nlang htē hpe woi shāraw nhtawm, sāgu ni a shawng ē sa wa wu ai rai nna, sāgu ni mung shi a nsen hpe chye chyap ma ai mājaw, shi kaw hkan nang ma ai.

5 Tsāsam wa a nsen hpe gaw, sāgu ni n chyē n chyap ma ai mājaw, tsāsam wa kaw n hkan hkrav ai she, hprawng mat wa ma ai, ngu nna shanhtē hpe tsun mu ni.

6 Yēsu gaw dai ga shādawn shanhtē hpe tsun mu ai; rai ti mung shi hpa lam tsun ai gaw, shanhtē n chyē na ma ai.

7 Dai rē ai mājaw Yēsu shanhtē hpe bai tsun mu ai gaw, Ngai nanhtē hpe gāja wa teng teng tsun dan mā de ga, Ngai gaw sāgu ni shang ai chyiningka hku rai nga nngai.

8 Nyē a shawng ē pru ai ni nlang htē gaw, lāgut, dāmya rai nga ma ai: sāgu ni mung shanhtē a ga hpe n mādat ya ma ai.

9 Ngai gaw chyiningka hku rai nga nngai: ngai hta shang ai wa gaw, hkye hkrang la hkrum na wu ai rai nna, shang wa pru wa rai Iu ai hte, udat shāra mu na wu ai.

10 Lāgut gaw, lāgu na, sat na, hpya sha na nga nna she sa ga ai: ngai chyawm gaw, sāgu ni asak hkrung lu na hte nhpwaw n-ya lu Ia mu ga, ngu nna sa ring ngai.

11 Ngai gaw sāgu rem wa kāja rai nngai: sāgu rem wa kāja gaw, sāgu ni a mātu tinang a asak nawng ya kau lu ai.

12 Sāgu ni hpe mādu ai wa n rē ai, nchyang she rai yang chyawm gaw, chyāhkyaown sa wa ai mu jang, sāgu ni hpe kau da nna hprawng mat wa ga ai; chyāhkyaown mung sāgu ni hpe amya shi nna shābra kau nga ai:

13 Dai wa gaw nchyang sha rai nga ai mājaw, sāgu ni a mātu n tsang ai hprawng mat wa ai.

14 Ngai gaw sāgu rem wa kāja rai nngai: nyē Wa gaw ngai hpe chyē ai rai nna, ngai mung Wa hpe chye nngai zawn,

15 Nyē a sāgu ni hpe ngai chye nngai, nyē a sāgu ni mung ngai hpe chyē ma ai: sāgu ni a mātu mung, nyē a asak ngai nawng ya kau nngai.

16 Ndai ulawng hte n seng ai sāgu kāga mung ngai naw lu nngai: dai sāgu ni hpe mung ngai woi wa lu na rai nna, dai ni mung nyē a nsen mādat na mā ra ai; shāloī sāgu hpung lāngai sha, sāgu rem wa lāngai sha, rai na ra ai.

17 Ngai gaw nyē a asak hpe bai lu la n ga, ngu nna asak nawng ya kau nngai mājaw, nyē Wa ngai hpe tsaw ra mngai.

18 Nyē asak hpe gāde ai kāshun la ya lu ai n rai: nyē a myit hte ngai nawng ya kau nngai: nawng ya kau na ahkang hte bai lu la na ahkang ngai lu nngai: dai ahkang gaw nyē Wa kaw na ngai lu Ia ni ai, ngu mu ai.

19 Shāloī dai ga a mājaw, Yuda māsha ni hta hka bra na lam bai pru wa mā lu ai.

20 Shanhtē hta na law law gaw, Shi nat shung nna māna nga ai: shi a ga hpe hpa rai mādat nga myit ta? nga ma ai.

21 Nkau mi gaw, Shi a ga gaw nat shung ai Wa a ga n rai: nat gaw myi n mu ai wa a myi hpe hpaw ya lu a ni? nga ma ai.

22 Ya Jerusalem māre ē Engēni poi rai nga ai:

23 Nshung ta mung rai nga ai; Yēsu gaw naw ku Htingmu na Shawlumon a jārapw ē htinglet hkawm nga ai.

24 Dai shāloī Yuda māsha ni gaw shi hpe grup rai nna, Nang gāloī du hkra anhtē hpe kam shut shāngun nga na n ta? Nang Hkristu rai n yang gaw anhtē hpe leng leng tsun dan mi, ngu mu ai.

25 Yēsu gaw, Ngai tsun ni ai, nanhtē māhtang n kam myit dai; nye Wa a my-

ing hte ngai gālaw ai amu ni gaw, nyē a lam sakse hkam ya nga ai.

26 Rai ti mung, nanhtē gaw nyē a sāgu n rai myit dai mājaw n kam myit dai.

27 Nyē a sāgu ni gaw, nye a nsen mādat ma ai rai nna, ngai shanhte hpe chyē nngai, shanhtē mung nyē a hpang hkan nang ma ai:

28 Ngai shanhtē hpe n htum n wai asak jaw da we ai rai nna, shanhtē gāloī mung hten bya ai hkrum na n rai; nyē a lāta na shanhtē hpe gāde ai kāshun la ya lu na n rai.

29 Shanhtē hpe nyē a lāta hta ap ya ai, nye Wa gaw, yawng hta grau kāba nga ai rai nna, kādai mung Wa a lāta na shanhtē hpe kāshun la ya lu na n rai.

30 Ngai hte nye Wa gaw lāngai sha rai nga ai, ngu nna shanhtē hpe htan mu ai.

31 Shāloī Yuda māsha ni gaw, shi hpe kābai na nga, nlung bai hta ma ai.

32 Yēsu gaw, Nyē Wa kaw na amu kāja law law wa ngai nanhtē hpe mādun ma sā de ai: dai amu ni hta na gāra māhtang a mājaw, ngai hpe nlung hte kābai na myit ta? ngu nna san wu ai.

33 Yuda māsha ni gaw, Kāja ai amu a mājaw nang hpe kābai na n rai, shātan ai ga tsun ndai hte, nang dai māsha rai da nna, Kārai Kāsang hpyi hpun ndai mājaw kābai na ga ai, ngu nna htan mu ai.

34 Shāloī Yēsu gaw, Nanhtē Kārai daw ni rai nga myit dai, ngu nna ngai tsun mā de ai, nga nna nanhtē a tāra laika hta ka da nga ai n rai mā lit ni?

35 Chyum laika hta na ga hpe n kau mai ai rai nna, Kārai Kāsang a mung ga dep la lu ai ni hpe, Kārai daw ni ngu lu ai rai yang gaw,

36 Nyē Wa ē shāchyoī shāpra nna, ndai mungkan ga de shāngun dat ai wa, Ngai Kārai Kāsang a Kāsha rai nngai, nga nna tsun ai a mājaw, dai wa hpe,

Nang shātan nhkan ga tsun ndai, mai ngu a ni?

37 Ngai nyē Wa a amu n gālaw nngai rai yang gaw, ngai e hkum kam myit.

38 Dai ngai gālaw nngai rai yang gaw, ngai e n kam ti mung, ngai hta nyē Wa nga nga ai mung, nyē Wa hta ngai nga nga ai mung, nanhtē mu chyē nna chyē na lu myit ga, dai amu ni hpe kam sham mu, ngu nna shanhtē hpe htan mu ai.

39 Shāloī shi hpe rim la na shanhtē bai tam ma ai: shi chyawm gaw shanhtē a lāta na pru mat wa ai.

40 Yawhan baptisma jaw hpang ai shāra, Yawdan hka wora hkran de, shi bai rap nna dai yang ē sa nga nga ai.

41 Māsha law law wa shi kaw du sa nna, Yawhan gaw gāja wa hpa lāmik kumla mādun āi n rai; ndai wa a lam Yawhan tsun mātsun chyawm gaw teng man nga ai, nga ma ai.

42 Dai yang ē mung māsha law law wa shi hpe kam sham ma ai.

## 11

Dai shāloī Mari hte kāna Marhta nga Dai Behtani kahtawng na, Lazaru ngu ai wa lāngai mi, māchyi nga ai.

2 Dai Māri gaw Mādu hpe mura chya nna, lāgaw hpe shi a kāra hte kātsut kau ai numsha rai nga ai: dai māchyi nga ai Lazaru gaw, shi a kāyung rai nga ai.

3 Dai rē ai mājaw dai yan nau gaw shi hpang de māsha shāngun dat nna, Mādu ē, yu u, nang tsaw ra ai wa gaw māchyi nga ai, ngu nna tsun dan mu ai.

4 Yēsu gaw dai ga na jang, Dai māchyi gaw si māchyi n rai: de a mājaw Kārai Kāsang a Kāsha hpung shingkang dan pru u ga nga nna, Kārai Kāsang a hpung shingkang mātu byin ai rai nga ai, ngu nna tsun dat wu ai.

5 Yēsu chyawm gaw Marhta hpe mung, shi a kānau hte Lazaru hpe mung tsaw ra wu ai,

6 Dai mājaw shi māchyi nga ai lam na jang, Yēsu gaw shi nga ai shāra ē ni ni naw hkring nga ai.

7 Dai hpang shi gaw, Anhtē Yuda mung de bai sa sā ga, ngu nna sāpe ē hpe tsun wu ai.

8 Shāloī sāpe ni gaw, Rabai ē, Yuda māsha ni ya pyi nang hpe nlung hte kābai sat na tam nga ma yang me, dai de naw bai sa na n n? ngu mu ai.

9 Yēsu gaw, Lāni mi hta ahkying shi lāhkawng rē ai, n rai n? Shāni chying tung ē hkawm sa ai wa gaw, ndai mung kan ga a nthoi hpe mu lu na rai nna, ahtu kātaw n rai ga ai:

10 Shāna nsin ē hkawm sa ai wa chyawm gaw, shi hta nthoi n rawng ai mājaw, ahtu kātaw ga ai, ngu mu ai.

11 Shing nga nhtawm, anhtē a jinghku wa Lazaru yup nga ai: rai ti mung, shi hpe jāsu na ngai sa na nngai, ngu nna shanhtē hpe bai tsun mu ai.

12 Dai rē ai mājaw sāpe ni gaw, Mādu e, shi yup nga ai she rai yang gaw, bran wa na ra ai, ngu nna htan mu ai.

13 Yēsu gaw Lazaru si sai lam tsun wu ti mung, shanhtē gaw mājoi na yup ai hpe tsun ai rai daw, nga nna myit ma ai.

14 Dai mājaw Yēsu gaw, Lazaru si sai:

15 Nan htē kam sham lu na mātu, dai yang ē ngai n nga hkrup ai mājaw, nanhtē a lam ngai kābu nngai: rai ti mung shi hpang de sa wa sā ga, ngu nna leng leng tsun dan mu ai.

16 Dai rai nna Didumu ngu ai Htawma gaw, Shi hte rau si nang na, anhtē mung hkan nang sā ga, ngu nna sāpe mānang ni hpe tsun mu ai.

17 Shing rai Yēsu du yang, Lazaru gaw lup hta rawng ai māli ya rai sai hpe, mu wu ai.

18 Behtani kāhtawng gaw Yerusalem māre hte mai lāhkawng dāram sha gang nga ai rai nna,

19 Marhta yan Mari a kāyung wa a mājaw, shan hpe shālan shābran na nga, Yuda māsha law law wa sa ma ai.

20 Yēsu du ra ai hpe Marhta na jang, shi hpe sa tau la na nga sā wa ai: Mari chyawm gaw nta ē naw dung nga ai.

21 Shāloī Marhta gaw, Mādu ē, nang nang ē nga ndai rai taw gaw, ngai yung n si na rē ai.

22 Ya rai ti mung Kārai Kāsang kaw nang hpyi māhpyi htē gaw, Kārai Kāsang nang hpe jaw na ndai ngai chyē nngai, ngu nna Yēsu hpe hkap tsun wu ai.

23 Shāloī Yēsu gaw, Ning yung wa gaw bai rawt na ra ai, ngu wu ai.

24 Marhta gaw, Hpang jāhtum na bai hkrung rawt ai nthoi hta, shi mung bai rawt na rai gaw, ngai chyē nngai, ngu wu ai.

25 Bai Yēsu gaw, Ngai gaw bai hkrun rawt ai lam hte asak hkrung ai lam rai nga nngai:

26 Ngai hpe kam sham ai wa gaw, si mat ti mung a hkrung nga na ra ai: asak hkrung nna ngai hpe kam sham ai wa kādai mung, si ai gāloī mung n hkrum na ra ai. Ga ndai hpe nang kam n ni? ngu nna shi hpe tsun wu ai.

27 Shāloī Marhta gaw, Rai sa, Mādu ē, nang gaw ndai mungkan ga de du sa ai, Hkristu ngu ai Kārai Kāsang a Kāsha rai nga ndai hpe, ngai kam nga nngai, ngu nna shi hpe htan wu ai.

28 Shing nga nhtawm shi a kānau Mari hpe wa lāgyim shāga nna, Sara nang de nga nga nna, nang hpe shāga nga ai, ngu wu ai.

29 Mari gaw dai ga na jang, alāwan rawt nna Yēsu hpang de sa wa ai.

30 Yēsu chyawm gaw kāhtawng de gārai n shang ai sha, Marhta sa tau ai shāra ē naw rai nga ai.

31 Dai mājaw shālan shābran ga tsun chyai let, Mari hte rau nta ē nga nga ai

Yuda măsha ni gaw, Mari alăwan rawt nna pru wa ai hpe mu ma yang, lup de sa hkrap na rai sam ai nga, myit nna shi kaw hkan nang ma ai.

32 Mari gaw Yēsu nga ai shāra de du nna shi hpe mu jang, shi a lāgaw nh pang ē dingnyawm dāgup let, Mădu ē, nang nang ē nga ndai rai taw gaw, ngai yung n si na rē ai, ngu wu ai.

33 Mari gaw hkrap ngu hkrap ngoi rai nga ai hpe mung, shi kaw hkan nang ai Yuda măsha ni hkrap ngu hkrap ngoi ma ai hpe mung, Yēsu mu wu yang, shi a wenyi hta shi yawn mădai ai hte, myit law ai rai nna,

34 Shi hpe kānang lup da mu ta? ngu nna san wu ai. Shan gaw, Mădu ē, sa yu nit, ngu nna htan mu ai.

35 Yēsu mung myi părwi pru nga ai.

36 Dai măjaw Yuda măsha ni gaw, Yu mu, shi gaw dai wa hpe grai wa tsaw ra naga a hka! nga ma ai.

37 Bai nkau mi gaw, Myi n mu ai wa hpe myi hpaw ya lu ai, ndai wa gaw, Lazaru hpe mung n si u ga nga, n di lu na a ni? nga ma ai.

38 Dai măjaw Yēsu gaw shi kraw kăta ē bai yawn mădai ai hte lup de sa du ai: dai lup gaw lungpu hku rai nga ai rai nna, lung tawng hte pat da nga ai.

39 Yēsu gaw, Nlung dai hpe gălau kau mu, ngu mu ai. Shăroi si ai wa a kăjan Marhta gaw, Mădu ē, ya gaw mănam na sai; shi si ai măli ya rai sai, ngu nna tsun wu ai.

40 Yēsu gaw, Nang kam n yang gaw, Kărai Kăsang a hpung shingkang nang mu lu na rin dai, ngu nna ngai tsun să de ai, n rai ni? ngu nna shi hpe tsun wu ai.

41 Dai rai nna nlung dai hpe shanhtē gălau kau mu ai. Shăroi Yēsu gaw lămu de măda yu nna Wa ē, nang nyē a ga mădat ya ndai măjaw, ngai nang hpe shăkawn nngai law.

42 Nang găroi mung nyē a ga a mădat ya nga ndai gaw, ngai chyē nngai; rai ti mung, nang ngai hpe shăngun dat ndai gaw, ndai grup yin nga ai măsha ni kam sham lu muga, shanhtē a mătu ngai ning nga tsun nngai, nga ai.

43 Shing nga tsun ngut jang shi gaw, Lazaru ē, pru wa rit law, nga nna nsen kăba hte jăhtau dat wu ai.

44 Shăroi si mat sai wa gaw, shi a lăgaw lăta hta sumpan yan ahkyen nna, myi man ē mung hpajet kăyawp ai hte pru wa ai, Yēsu gaw, shi hpe raw nna dat dat mu, ngu nna shanhtē hpe tsun mu ai.

45 Dai rē ai măjaw Mari kaw sa hpu ai Yuda măsha law law wa, Yēsu gălaw ai amu hpe mu jang shi e kam sham ma ai.

46 Nkau mi chyawm gaw, Hparishe ni hpang de wa nna, Yēsu gălaw ai lam wa tsun dan mu ai.

47 Dai rai nna hkinjawng agyi ni hte Hparishe ni gaw, du sălang ni hpe shăga jăhpawng nhawm, Anhtē kăning rē ai rai nga ga ta? dai wa gaw lămik kumla law law mădun dan nga ai.

48 Shi hpe ning di a dat da nga ga yang gaw, măsha yawng măyawng shi hpe kam sham ma na mă ra ai rai nna, Roma măsha ni mung sa nna, anhtē a mungdan hte anhtē a amyu hpe kăshun la kau na mă ra ai, nga ma ai.

49 Rai ti mung, shanhtē hta na, dai shăning ē hkinjawng agyi aya lu ai, Kayapa ngu ai wa lăngai mi gaw, Nanhtē hpa mung n chyē myit dai:

50 Amyu ting hten bya n hkrum hkra, ndai amyu a mătu măsha lăngai mi si hkam yang gaw, nanhtē a mătu grau mai nga ai hpe, nanhtē n myit yu myit hka, ngu nna tsun wu ai.

51 Ga dai gaw shi a myit hte shi tsun ai n rai: dai shăning ē hkinjawng agyi rai nga ai măjaw, Yēsu gaw amyu măsha

ni a mătu si hkam lu na rē ai, nga nna mung,

52 Dai amy u a mătu sha n rai, shăra shăgu hkan ē bra nga ai, Kărai Kăsang a kăshu kăsha ni hpe lăngai sha di nna, shinggyin jăhpawng da na mătu si hkam lu na rē ai, nga nna mung, myihtoi ga hte tsun ai rai nga ai.

53 Dai shăni kaw nna shi hpe sat kau na lam shanhtē bawng nga ma ai.

54 Dai măjaw Yēsu gaw Yuda măsha ni kaw, dan dan bai n hkawm ai sha, dai yang na pru nhawm, nam de ni ai ginwang na Ehprim ngu ai măre de sa wa nna, shi a săpe ni hte rau dai yang ē nga nga ai.

55 Ya Yuda măsha ni a Shălai wa poi du măgang ra ai rai nna, măsha law law wa tinang a hkum jăsan jăseng na mătu, poi gărai n du yang, kăhtawng ginwang hkan na Yerusalem măre de lung wa ma ai.

56 Dai măjaw shanhtē gaw Yēsu hpe tam nna, naw ku Htingnu ē jawm tsap let, Nanhtē kăning rai myit nga myit ta? Shi gaw ndai poi n sa na myit a ni? nga nna shăda sa san ma ai.

57 Dai shăroi ē hkinjawng agyi ni hte Hparishe ni gaw, shi hpe rim la lu hkra, kădai rai ti mung shi nga ai shăra chyē yang gaw, mădun lu na rē ai, nga nna hkang da mă sai.

## 12

Dai rē ai măjaw Yēsu gaw, si ai kaw na shărawt la ai Lazaru nga ai Behtani kăhtawng de, Shălai wa poi du na kru ya naw ra yang, sa du ai.

2 Shăroi shanhtē gaw shi hpe shăna shat hkap daw mu ai rai nna, Marhta gaw shat lusha jau nga ai: Lazaru gaw shi hte dung nga nna lusha ai hta lawm ai wa lăngai mi, rai nga ai.

3 Shăroi Mari gaw hpu la ai mura nardu sau ajet hkan măsum dăram Ia

nna, Yēsu a lăgaw hta chya ya nhawm, shi a kăra hte kătsut kau wu ai: dai sau a mănam pyaw ai gaw, nhku ting hpring chyat rai nga ai.

4 Rai ti mung, Yuda Iskarut ngu ai, shi hpe ap kau na ra ai, shi a săpe lăngai mi gaw,

5 Dai mura sau hpe gumhpraw lap măsum tsa hte dut nna, mătsan măyan ni hpe hpa di n kăran jaw wu ta? ngu wu ai.

6 Shi shing nga ai gaw, mătsan măyan ni a mătu myit ya nna tsun ai n rai: shi gaw gumbpraw jan jum ai wa rai nga ai rai nna, bang da ai gumhpraw hta na sen di sha ai lăgut rai nga ai măjaw, tsun ai sha rai nga ai.

7 Dai măjaw Yēsu gaw, Rai nu ga, ngai hpe lăjjang lup ai shăni du hkra, shi dai hpe kyem da u ga:

8 Mătsan măyan ni gaw nanhtē hte rau tut a nga nga ai, ngai chyawm gaw nanhtē hte tut tut a nga nga na n rai, ngu wu ai.

9 Yēsu dai yang nga nga ai gaw, Yuda măsha ni hta shăwa măsha law law wa chyē ma ai rai nna, shanhtē gaw Yēsu a măjaw sha mung n rai, si ai kaw na shi shărawt la ai Lazaru hpe mung mu yu na nga, du sa shăjang ma ai.

10 Dai măjaw hkinjawng agyi ni gaw Lazaru hpe mung sat kau na, nga nna bawng nga ma ai:

11 Kăning rai nme law, shi a lam măjaw Yuda măsha law law wa pru sa wa nna, Yēsu hpe kam sham ma ai.

12 Dai hpang shăni ē Yēsu gaw Yerusalem măre de sa wa ra ai hpe, dai poi de su ai shăwa măsha law law ni na jang,

13 Shanhtē gaw namhtan hpun lăkung ni daw lang nna shi hpe sa tau la let, Hawsanna: Dai Mădu a amying hte du sa ai wa ngu ai, Israela a hkawkam gaw, a nga u ga law, nga nna găru ma ai.

14 Shāloī Yēsu gaw lawze kāsha mu nna jawn wu ai: dai gaw,

15 Ziun shāyi sha ē, hkum hkrit ēt; Yu u, na a hkawhkam gaw Lawze kāsha jawn nna du sa ra ai, nga nna ka da ai hte māren rai nga ai.

16 Dai lam ni hpe shawng ē gaw shi a sāpe ni n chye ma ai: rai ti mung, Yēsu gaw hpung shingkang lu la ai hpang ē she, shi hpe shāang nna shing nga ka da ai mung, dai hku raw shanhtē shi hpe di mu ai mung, dum chyē ma ai.

17 Dai lam byin ai gaw, Lazaru hpe lup kāta na shāga nna, si ai kaw na shārawt la ai shāloī e, shi hte rau nga ai shāwa māsha ni ē sakse hkam ya ai rai nga ai.

18 Dai lam mājaw mung, shāwa māsha ni shi hpe sa tau ai rai nga ai: kāning rai nme law, shi dai lāmik kumla mādun dan ai gaw, shanhtē na ma sai.

19 Dai rē ai mājaw Hparishe ni gaw, Nanhte kāning mung n di lu mā nit dai gaw, yu mu; gāja wa mungkan ting shi kaw hkan mat wa mā sai, nga nna shāda da tsun shājang ma ai.

20 Dai poi a lāman ē naw ku na nga, lung wa ai ni hta Heleni māsha nkau mi lawm ma ai.

21 Dai ni gaw Galile mung na Bet-saida māre māsha Hphilip kaw sa nna, Hkau ē, anhtē gaw Yēsu hpe hkrum māyu ga ai, ngu nna tsun mu ai.

22 Shāloī Hphilip gaw Andre hpe sa tsun nna, Andre yan Hphilip gaw Yēsu hpe sa tsun dan mu ai.

23 Dai rai nna Yēsu gaw, Māsha Kāsha a hpung shingkang dan hkung na ahkying du wa ra ai:

24 Nanhtē hpe ngai gāja wa teng teng tsun ma de ai gaw, Mam nhkyep gaw ga hta hkrat nna, n hten mat yang gaw, lāngai sha a rai nga ai: hten mat yang she, asi law law si wa ai.

25 Tinang a asak lāhpawt ai wa gaw ăsak sum na ra ai: ndai mungkan

ga ē tinang asak hpe n dawng ai wa chyawm gaw, htani htana na asak lu la hkra, tinang a asak hpe mākawp ai tai na ra ai.

26 Nyē a amu gun hpai ai wa rai yang gaw, nyē a hpang hkan nang ru ga: ngai nga ai shāra ē, nyē a shāngun ma mung nna na ra ai; nyē a amu gun hpai ai wa rai yang gaw, nyē Wa dai wa hpe shāgrau na ra ai.

27 Ya ngai myit ru nga nngai: ngai kāning ngu tsun na i? Wa ē, ndai ahkying hta na ngai hpe hkye hkrang la e: ning ngu yang mung ndai lam a mājaw she, ndai ahkying de ngai du wa ni ai:

28 Wa ē, na a mying ningsang hpe sha shāgrau u law, nga nna shan hpe tsun wu ai. Shāloī sumsing lāmu de na ga nsen gaw, Ngai shāgrau se ai, bai naw shāgrau na we ai, nga nna, ngoi pru wa ai.

29 Dai yang ē tsap hpawng nga nna, dai lam na ai ni gaw, Mu ngoi nga ai, nga ma ai: nkau mi mung, Lāmu kāsa shi hpe sa tsun ai rai nga ai, nga ma ai.

30 Yēsu gaw, Nsen ndai gaw nyē a mātu ngoi pru ai n rai, nanhtē a mātu māra rai nga ai.

31 Ndai mungkan ga gaw, ya jeyang ai hkrum nga ai: ndai mungkan Du wa gaw, ya shinggan de shāden kau ai, hkrum na rai wa sai.

32 Ngai chyawm gaw ga nna shārawt tawn da ai hkrum jang, ngai māsha yawng hpe, ngai hpang de gang la na we ai, ngu nna htan mu ai.

33 Shing nga ai gaw, shi si hkam na kumla mādun nna, tsun ai rai nga ai.

34 Dai nga ai mājaw shāwa māsha ni gaw, Hkrustu gaw htani htana a grin nga na rē ai, nga nna she tāra laika hta rawng ai anhtē na yu ga ai: dai rē ai mi, nang gaw, Māsha Kāsha shārawt da ai hkrum lu na ra ai, nga ai gaw, hpa nga ai rai lit ta? Māsha Kāsha dai gaw, kādai wa mi rai ta? ngu nna shi hpe htan mu ai.

35 Dai rai nna Yēsu gaw, Dai nhtoi gaw nanhtē hta loi hkring mi sha naw nna na sai: dai nsin gaw nanhtē hpe n lep myit ga, nanhtē hta nhtoi naw nna yang hkawm sa mu: nsin ē hkawm sa ai wa gaw tinang gāde sa wa ai mung, n chyē wu ai.

36 Nanhtē hta nhtoi naw nna yang nhtoi hāka kāshu kāsha ni tai lu myit ga, nhtoi hpe kam sham nga mu, ngu nna shanhtē hpe tsun mu ai. Yēsu gaw ndai ga tsun ngut jang pru nna, shanhtē kaw na mākoi mat nga ai.

37 Lāmik kumla ndai htē wa shanhtē a man ē shi mādun dan mu ti mung,

38 Mādu e, anhtē tsun ai shi ga hpe kādai kam ya a ta? Dai Mādu a lāta mung kādai kaw dan yu a ta? nga nna myiltoi Esaia tsun ai ga dik wa na re ai mājaw, shanhtē gaw shi hpe n kam ma ai.

39 Bai Esaia tsun ai hta, shanhtē myi ē n mu, myit māsin hte n chyē na nna, Ngai shanhtē hpe n shamai mai gaw, Myit n kāyin lu mu ga,

40 Shanhtē a myi hpe shi māgap ya nna, Shanhtē a myit māsin hpe mung shāja ya wu ai, nga ai ga mājaw, shanhtē n kam n sham Iu ma ai.

41 Esaia gaw shi a hpung shingkang mu lu ai rai nna, shi a lam shing nga tsun ai rai nga ai.

42 Rai ti mung, du ni hta pyi law law wa shi hpe kam sham shājang ma ai: dai rai ti mung, Tāra jawng na shāpraw kau na hpe tsang nna, Hparishe ni a jaw ē n yin hkrav ma ai:

43 Kāning rai nme law, Kārai Kāsang kaw na arawng sādang lu la na hta, māsha kaw na arawng sādang lu la na hpe, grau ra ma ai.

44 Bai Yēsu jāhtau nna tsun ai gaw, Ngai hpe kam sham ai wa gaw, ngai hpe kam sham ai n rai; ngai e shāngun dat ai wa hpe kam sham ai rai nga ai

45 Ngai hpe māda mu ai wa gaw, ngai e shāngun dat ai wa hpe māda mu ai rai nga ai.

46 Ngai hpe kam sham ai yawng htē gaw, nsin hta n rawng nga mu ga, ngu nna nhtoi tai let, ngai mungkan ga de du sa ring ngai.

47 Nyē a ga na la nhtawm, n hkan nang ai wa kādai hpe mung ngai jēyang na n rai: kāning rai nme law, mungkan ga hpe jēyang na ngu nna, ngai du sa nngai n rai, mungkan ga hpe hkye la na she sa nngai.

48 Ngai hpe n hkap la ai hte nyē a ga n hta la ai wa hpe, jēyang na mādu kāga mi nga ai: ngai tsun ai mung ga ē nan, hpang jāhtum na nhtoi hta, dai wa hpe jēyang na ru ai.

49 Ngai chyawm gaw nyē myit hte tsun ai n rai; ngai kāning ngu shārin shāga na gaw, ngai hpe shāngun dat ai, nyē Wa ē mātsun jaw dat ni ai.

50 Shi a ga mātsun gaw htani htana na asak rai nga ai, ngai chyē nga nngai: dai rē ai mājaw, ngai tsun mātsun gaw, nyē Wa ē hkang dat ai hte māren she, ngai tsun mngai law, ngu wu ai.

### 13

**Y**a dai Shālai wa poi gārai n du yang, Yēsu gaw ndai mungkan ga nna, shi a Kāwa hpang de htawt wa na ahkying du wa sai, chye wu ai rai nna, mungkan ga ē nga ai shi a māsha ni hpe tsaw ra nga ai rē ai hte māren, jāhtum nhtoi du hkra shanhtē hpe tsaw ra mu ai.

2 Shāna shat sha nga yang, gumlau Nat gaw Simun a kāsha Yuda Iskarut a kraw kātē ē shi hpe ap kau na, hpaji daw bang ya boi nu ai rai nna,

3 Yēsu gaw Kāwa ē shi a lāta de nga yawng nga pra ap ya nu ai mung, Kārai Kāsang kaw na shi pru sa nna, Kārai Kāsang hpang de bai wa na rai nga ai mung, chyē wu ai mājaw,

4 Shat sha nga ai kaw na shi rawt nna, shi a pälawng käba raw kau nhtawm, hpajet längai mi la nna nshang ē kyit wu ai.

5 Dai hpang angdung hta ntsin bang la nna, sâpe ni a lägaw hpe käshin ya nhtawm, shi kyit ai hpajet hte kätsut kau ya ya di mu ai.

6 Shing rai Simun Petru kaw du yang, dai wa gaw, Mädu ē, nang wa mi ting, nyē a lägaw käshin na n ni? hkap ngu wu ai.

7 Yësu gaw, Ngai gälaw ai lam nang ya n chyē ti mung, hpang de she chyē na rin dai, ngu nna shi hpe htan wu ai.

8 Petru gaw, Nyē a lägaw, hpe nang gäloï mung n käshin lu na ndai, bai ngu wu ai. Bai Yësu gaw, Ngai nang hpe n käshin lu yang gaw, nang ngai hte n seng ndai, ngu nna shi hpe tsun wu ai.

9 Shäloï Simun Petru gaw, Mädu ē, nyē lägaw sha n rai, läta hte abaw mung käshin ya rit, bai ngu wu ai.

10 Yësu gaw, hka shin ngut sai wa gaw, lägaw hta käga, hpa käshin shära n nga sai; dai wa a hkum ting gäw san seng nga sai; nanhtē mung san seng nga myit dai, rai ti mung, nanhtē yawng wa n rai, ngu wu ai.

11 Käning rai nme law, shi hpe ap kau na wa kädai rē ai gaw, shi chyē da wu ai: dai rē ai mäjaw, Nanhtē yawng wa san seng myit dai n rai, ngu nna tsun wu ai.

12 Shing rai shanhtē a lägaw käshin ya ngut nna, shi a palawng käba la hpun nhtawm, bai dung nga let shi gaw, Ya nanhtē hpe ngai gälaw ai lam, nanhtē chye da mu ni?

13 Nanhtē ngai hpe, Sära nga nna mung, Mädu nga nna mung, hkungga myit dai; dai hte mären ngai rai nga nngai mäjaw, nanhtē a ga mung rai la sai.

14 Dai rai nna, Mädu mung, Sara mung rai da ninglen, ngai pyi nanhtē a

lägaw käshin nngai rai yang gaw, nanhtē mung, nanhtē shäda a lägaw mai käshin myit dai.

15 Nanhtē hpe ngai gälaw ai zawn, nanhtē mung hkan gälaw myit ga, ngu nna ngai nanhtē a mätu käsi kämang tawn da ni ai.

16 Ngai nanhtē hpe gäja wa teng teng tsun mä de ga, Mäyam wa gaw mädu hta grau ai n rai, käsä mung shängun dat ai wa hta grau ai n rai:

17 Ndai lam ni hpe nanhtē chyē nna, dai hpe hkan shatup myit yang gaw, nanhtē a lu myit dai.

18 Nanhtē yawng hpe shäang nna ngai tsun nngai n rai: ngai läta la ai ni hpe gaw, ngai chyē da we ai: rai ti mung, Nyē a shat sha ai wa gaw, shi a lähtin hte ngai hpe shingdit nngai, nga nna ka da ai ga shädk na a mäjaw rai nga ai.

19 Dai lam byin pru ai shäloï, ngai dai wa rai nga nngai gaw, nanhtē kam sham myit ga, ngu nna gärai n byin yang na tau tsun mägang da mä de ai.

20 Ngai nanhtē hpe gäja wa teng teng tsun mä de ai gaw, Ngai shängun dat ai wa e hkap la ai wa gaw, ngai hpe hkap la ai, rai nga ai: ngai e hkap la ai wa mung, ngai hpe shängun dat ai wa e hkap la ai, rai nga ai, ngu nna shanhtē hpe tsun wu ai.

21 Yësu gaw shing nga tsun ngut jang, shi a myit hta yawn la ai hte, Ngai nanbte hpe gäja wa teng teng tsun nngai gaw, Nanhtē hta na märai längai mi, ngai hpe ap kau na myit dai, ngu nna sakse hkam nga ai.

22 Dai rai nna sâpe ni gaw, kädai hpe shäang nna tsun ai mung n chyē mu ai mäjaw, myit ung ang ai hte shäda da mäda hkat ma ai.

23 Shäloï Yësu tsaw ra ai sâpe längai mi gaw, shi ku mäkau ē, Yësu a lähpyen hta hkrawn taw nga ai rai nna,

24 Simun Petru gaw, Shi kädai hpe shäang nna tsun ngä a ta, anhtē hpe tsun dan mi, ngu nna dai sâpe hpe dingsi tsun wu ai.

25 Shäloï dai sâpe gaw, Yësu a lähpyen de käyin shämeyt nna, Mädu ē, kädai mähtang rai ta? ngu nna san wu ai.

26 Dai rē ai mäjaw Yësu gaw, Ngai muk n-gup mi tsing nna jaw ai wa rai na rē ai, nga nhtawm, dai muk n-gup mi tsing la nna, Simun Iskarut a käsha Yuda hpe jaw wu ai.

27 Dai wa dai muk n-gup mi la sha ngut jang, Satan gaw shi hta shang nu ai. Dai rē ai mäjaw, Yësu gaw, Nang gälaw ra ai amu lau lau gälaw u, ngu nna shi hpe tsun wu ai.

28 Hpa mäjaw shi e shing nga tsun ai gaw, shi ku mäkau ē dung nga ai ni hta, kädai mung n chyē ma ai.

29 Käning rai nme law, Yuda gaw gumhpraw jan jum ai wa rai nga ai mäjaw, Yësu gaw shi hpe, Poi na mätu anhtē lang ra ai sa märi u, nga sam ai, nga nna mung, shing n rai, Mätsan mäyan ni hpe läma ma sa jaw u, nga sam ai, nga nna mung, shanhtē hta nkau mi myit ma ai.

30 Yuda gaw dai muk n-gup mi la sha nhtawm, shäloï jang pru mat wa ai: dai shäloï gaw shäna nsin rai nga ai.

31 Dai wa pru mat wa ai hpang Yësu gaw, Mäsha Käsha gaw, ya hpung shingkang dan hkung nga ai rai nna, Kärai Käsan mung Mäsha Käsha a hkum hta hpung shingkang dan hkung nga ai:

32 Kärai Käsan gaw shi hkum nan Mäsha Käsha a hpung shingkang shäpraw ya na wu ai: rai sa, gäde n na yang shi hpe hpung shingkang shäpraw ya na ra ai.

33 Ngai sha ni ē, ngai nanhtē hte hkring mi naw nga na nngai. Nanhtē ngai hpe tam na mä rin dai: Ngai wa ai

shära de mung nanhtē n du lu na myit dai, ngu nna Yuda mäsha ni hpe ngai tsun ai hte mären, nanhtē hpe mung ngai tsun dan mä de ai.

34 Nanhtē shäda da tsaw ra nga mu, ngu nna tåra ningnan ngai nanhtē hpe jaw da mä de ai: ngai nanhtē hpe tsaw ra mä de ai zawn, nanhtē mung shäda da tsaw ra nga na rai myit dai.

35 Shing rai nanhtē shäda tsaw ra ai myit rawng nga myit yang gaw, nanhtē nyē a sâpe ni rai nga myit dai gaw, mäsha yawng mäyawng chyē lu na ma ra ai, ngu mu ai.

36 Simun Petru gaw, Mädu ē, nang gäde sa mat wa na n ta? ngu nna Yësu hpe san wu ai. Yësu gaw, Ngai sa wa ai shära de, nang ya n hkan lu na ndai, hpang de she hkan nang lu na rin dai, ngu nna htan wu ai.

37 Bai Petru gaw, Mädu ē, ngai nang hte rau hpa rai ya n hkan lu na rai ta? Na a mäjaw nyē a asak ngai nawng kau ya na we ai, ngu wu ai.

38 Bai Yësu gaw, Nang wa nyē a mäjaw, na asak nawng kau na wu ni? Nang hpe ngai gäja wa teng teng tsun de ga, U gärai n goi yang, nang ngai hpe mäsum lang nyet kau na rin dai, ngu nna shi hpe htan wu ai.

## 14

**N**anhtē myit hkum ru myit: Kärai Käsan hpe kam mu, ngai hpe mung kam mi.

2 Nyē Wa a nta ē nga shära law law nga ai; dai n nga yang gaw, N nga, ngu nna ngai n tsun ai, nga na n rai: käning rai nme law, nanhtē a mätu nga shära läjang na she, ngai wa na nngai.

3 Shing rai ngai wa nna, nan htē a mätu nga shära läjang da nhtawm, ngai nga ai shära ē nanhtē mung nga lu hkra, ngai bai sa nna, nanhtē hpe ngai hpang de woi la na mä de ai.

4 Ngai sa wa ai shāra de du ai lam nanhtē chyē nga myit dai, ngu mu ai.

5 Shāloī Htawma gaw, Mādu ē, nang gāde sa wa na pyi, anhtē n chyē ga ai mi, lam kāning rai chyē ga ta? ngu nna shi hpe tsun wu ai.

6 Yēsu gaw, Lam gaw ngai rai nga nngai, teng man ai hte asak mung, ngai rai nga nngai: ngai hta nna n rai yang gaw, kādai mung nyē Wa kaw n du wa lu ai.

7 Nanhtē ngai hpe chyē mā nit dai rai yang gaw, nyē Wa hpe mung chyē na ma nit dai: ya kaw nna nanhtē shi hpe chyē mā nit dai, mu mung mu mā nit dai, ngu nna shi hpe tsun wu ai.

8 Hpilip mung, Mādu ē, Wa hpe anhtē e mādun mi, shāloī anhtē myit dik na ga ai, ngu wu ai.

9 Yēsu gaw, Hpilip ē, ngai nanhtē hte nde nlaw na hkra nga nga sā ti mung, nang ngai hpe n chyē n ni? Ngai hpe mu yu ai wa gaw, Wa hpe mu yu nu ai: dai rē ai mi, Wa hpe anhtē e mādun mi, nna hpa rai tsun n ta?

10 Ngai gaw Wa hta nga nngai mung, Wa gaw ngai hta nga nga ai mung, nang n kam n ni? ngai nanhtē hpe tsun ai ga gaw nyē a myit hte ngai tsun ai n rai: ngai hta rawng ai nyē a Wa gaw, shi a amu gālaw nga ai.

11 Ngai gaw Wa hta nga nngai mung, Wa gaw ngai hta nga nga ai mung, kam sham nga mi: dai n rai yang gaw, dai amu ni hpe tau yu nna pyi, kam sham nga mi.

12 Nanhtē hpe ngai gāja wa teng teng tsun mā de ai gaw, Ngai hpe kam sham ai wa gaw, ngai gālaw ai amu lu gālaw na ra ai; dai hta grau kāba ai amu mung, lu gālaw na ra ai: kāning rai nme law, ngai gaw Wa hpang de wa na nngai.

13 Shing rai, Wa gaw Kāsha a mārāng e hpung shingkang lu la hkra, nyē a amying gang nna, nanhtē hpyi mahpyi, ngai mādat ya na nngai.

14 Nanhtē nyē a amying gang nna, ngai kaw lāma ma hpyi myit yang, hpyi ai hte māren ngai mādat ya na nngai.

15 Nanhtē ngai hpe tsaw ra myit dai rai yang gaw, nyē a ga mātsun hkan shātup na myit dai.

16 Ngai mung Wa kaw hpyi nna, Wa mung, nanhtē hte prat tup rau nga na mātu, teng man ai hte seng ai Wenyi ngu ai Shālan Shābran ai wa kāga, nanhtē kaw shāngun dat ya na ra ai:

17 Mungkan ga gaw dai Wenyi hpe n mu n chyē ma ai mājaw, n hkap la lu ma ai: nanhtē chyawm gaw dai Wenyi hpe chye nga myit dai; kāning rai nme law, shi gaw nanhtē hte rau rai nga ai, nanhtē hta mung rawng nga na ra ai.

18 Nanhtē hpe jāhkrai zawn ngai kau da na n rai: nanhtē hpang de ngai bai sa na ring ngai.

19 Loi hkring mi rai jang, mungkan ga gaw ngai hpe n mu dat na nu ai: nanhtē chyawm gaw naw mu lu na mā rin dai: kāning rai nme law, ngai a hkrung nga nngai mājaw, nanhtē mung a hkrung nga na mā rin dai.

20 Ngai gaw nyē Wa hta nga nngai mung, nanhtē ngai hta nga nngai mung, ngai nanhtē hta nngai mung, dai shāni ē nanhtē chyē lu na mā rin dai.

21 Nyē a ga matsun lu la nna hkan shātup ai wa gaw, ngai hpe tsaw ra ai wa rai nga ai: ngai e tsaw ra ai wa hpe, nyē Wa mung tsaw ra na wu ai: ngai mung dai wa hpe tsaw ra ai hte, ngai hkum nan shi e shādan dan na we ai, ngu nna shi hpe tsun wu ai.

22 Yuda Iskarut n rē ai, kāga Yuda gaw, Mādu ē, na a hkum anhtē hpe shādan dan nhtawm, mungkan ga hpe n shādan dan na gaw, hpa mājaw rai na a ta? ngu nna san wu ai.

23 Yēsu gaw, Ngai e tsaw ra ai wa rai yang gaw, nyē ga mātsun hkan shātup

na ra ai: nyē Wa mung dai wa hpe tsaw ra na wu ai rai nna, an lāhkawng gaw dai wa kaw sa nna shi hte rau hpawng de nga na ga ai.

24 Ngai e n tsaw n ra ai wa gaw, nyē a ga n hkan shātup lu ai: dai hta kāga, nanhtē na la lu ai mung ga gaw, nyē a ga n rai li ai, ngai hpe shāngun dat ai, nyē Wa a mung ga rai nga lu ai.

25 Ngai nanhtē hte rau naw nga nngai, ga ndai ngai nanhtē hpe tsun da mā sā de ai.

26 Nyē Wa ē nyē a amying hte shāngun dat na ra ai, Shālan Shābran ai wa ngu ai, Chyoi pra ai Wenyi gaw, nanhtē hpe lam māgup shārin ya nna, ngai nanhtē hpe tsun da ai ga yawng māyawng, nanhtē hpe shādum shāhrang ya na ra ai.

27 Ngwi pyaw ai gaw ngai nanhtē hta da ya ma sā de ai; nyē a ngwi pyaw ai nanhtē hpe ngai jaw ma de ai: mungkan ga na ni jaw ai zawn, ngai nanhtē hpe jaw ma de ai n rai. Nanhtē myit hkum ru myit, hkrit mung hkum hkrit myit.

28 Ngai wa nna, nanhtē kaw bai sa na ring ngai, ngu nna ngai nanhtē hpe tsun ai gaw, nanhtē na ma nit dai: nanhtē ngai hpe tsaw ra myit dai rai yang gaw, Wa hpang de ngai wa ai mājaw, nanhtē kābu na rai myit dai; kāning rai nme law, Wa gaw ngai hta yang gaw, dai wa gaw asi law law si wa lu ai: kāning rai nme law, ngai hte hka jang, nanhtē hpa mung n gālaw lu myit dai.

6 Ngai hta n jung n noi ai wa gaw, lākung lākying hpe zawn kābai kau ai hkrum nna hkraw mat wa ai hte, māsha ni ē māgawn la nhtawm, wan hta kābai bang nna, hkru krawp mat ai kaw du wa ai.

7 Nanhtē ngai hta noi nga nna, nyē ga mung nanhtē hta noi nga ai rai yang gaw, nanhtē hpa hpyi māyu yang hpyi mu, hpyi ai hte māren nanhtē e mādat ya na ra ai.

8 Nanhtē asi law law si wa ai a mājaw, nyē Wa a hpung shingkang dan hkung wa nna, nanhtē mung, nyē a sāpe ni teng na myit dai.

N

Ngai gaw teng man ai tsābyi ru rai N

nga nngai, nyē Wa gaw tsābyi sun mādu rai nga ai.

2 Ngai hta asī n si ai lākung shāgu hpe gaw, shi krum kau wu ai: asī si ai lākung shāgu hpe chyawm gaw, asī grau si u ga nngai, tsan kau ya wu ai.

3 Nanhtē chyawm gaw, ngai nanhtē hpe tsun dan ai mung ga mājaw, ya ē pyi asan apra rai mā nit dai. Ngai hta noi nga mu, ngai mung nanhtē hta noi nngai.

4 Tsābyi lākung gaw tsābyi ru mādung hta n jung n noi yang gaw, shi chyu sha asī n si lu ai zawn, nanhtē mung ngai hta n jung n noi myit yang gaw, asī n si lu na myit dai.

5 Ngai gaw tsābyi ru mādung rai nngai, nanhtē gaw lākung lākying ni rai nga myit dai: ngai hta noi nga nna, ngai mung dai wa hta noi nga ai rai yang gaw, dai wa gaw asi law law si wa lu ai: kāning rai nme law, ngai hte hka jang, nanhtē hpa mung n gālaw lu myit dai.

6 Ngai hta n jung n noi ai wa gaw, lākung lākying hpe zawn kābai kau ai hkrum nna hkraw mat wa ai hte, māsha ni ē māgawn la nhtawm, wan hta kābai bang nna, hkru krawp mat ai kaw du wa ai.

7 Nanhtē ngai hta noi nga nna, nyē ga mung nanhtē hta noi nga ai rai yang gaw, nanhtē hpa hpyi māyu yang hpyi mu, hpyi ai hte māren nanhtē e mādat ya na ra ai.

8 Nanhtē asi law law si wa ai a mājaw, nyē Wa a hpung shingkang dan hkung wa nna, nanhtē mung, nyē a sāpe ni teng na myit dai.

9 Wa gaw ngai hpe tsaw ra ai zawn, ngai mung nanhtē hpe tsaw ra mā de ai: nyē a tsaw ra ai hta māju jung nga mu.

10 Ngai gaw nyē Wa a ga mātsun hkan shātup nna, shi a tsaw ra ai hta māju jung nga nngai zawn, nanhtē mung nyē a ga mātsun hkan shātup myit yang gaw, nyē a tsaw ra ai hta māju jung na myit dai.

11 Nyē a kābu gāra ai myit nanhtē hta rawng nga na hte, nanhtē a kābu gāra ai gaw hpring tup wa na mātu, ga ndai ngai nanhtē hpe tsun da mā de ai.

12 Ngai nanhtē hpe tsaw ra ma de ai zawn, nanhtē shāda da tsaw ra nga mu, dai gaw nyē a ga mātsun rai li ai.

13 Jinghku wa a mātu tinang a asak nawng kau hkra tsaw ra ai myit hta, grau kāba ai tsaw ra ai myit gaw kādai hta mung n rawng nga ai.

14 Nanhtē nyē a ga mātsun hkan shātup myit yang gaw nanhtē nyē a jinghku ni rai nga myit dai.

15 Ya kaw nna ngai nanhtē hpe māyam n ngu na ni ai; kāning rai nme law, mā Yam gaw mādu gālaw ai amu hpe n chyē wu ai: nanhtē hpe jinghku she ngai ngu na ma de ai; nyē Wa kaw na ngai na la ai htē yawng, ngai nanhtē hpe chyē shāngun mā sā de ai.

16 Nanhtē ngai hpe lāta la myit dai n rai, ngai she nanhtē hpe lāta la mā de ai rai nna, nanhtē gaw pru sa nna, asi si na hte, nanhtē a asi grin nga u ga, ngu nna mung, nyē a amying hte Wa kaw nanhtē hpyi mahpyi lu la mu ga, ngu nna mung, ngai nanhtē hpe san da mā sā de ai.

17 Nanhtē shāda da tsaw ra nga myit ga, ngu nna she, ngai nanhtē hpe ndai ga mātsun ni jaw da mā de ai.

18 Mungkan māsha ni nanhtē hpe n dawng n yawt myit yang, nanhtē hpe gārai n rai yang, ngai hpe shawng n dawng ma ai gaw, chyē nga mu.

19 Nanhtē mungkan ga hte seng ai ni rai myit yang gaw, mungkan ga gaw tinang hte seng ai ni hpe tsaw ra nga mā sai: nanhtē chyawm gaw mungkan ga hte seng ai ni n rai myit dai hte, ndai mungkan ga na ngai nanhtē hpe lāta la mē de ai mājaw, mungkan ga gaw nanhtē hpe n dawng n yawt ai rai nga ai.

20 Māyam gaw mādu hta grau kāba ai n rai, ngu nna ngai nanhtē e tsun ai ga hpe dum nga mu: ngai hpe pyi zingri zingrat ma aī rai yang gaw, nanhtē hpe mung zingri zingrat na mā ra ai: nyē a ga mādat māra ma ai rai yang gaw nanhtē a ga hpe mung, mādat māra ya na ma ra ai.

21 Rai ti mung shanhtē gaw nyē amying a mājaw, dai lam yawng nanhtē hpe di na mā ra ai: kāning rai nme law, ngai e shāngun dat ai wa hpe shanhtē n chyē ma ai.

22 Ngai shanhtē hpe n sa tsun ai rai taw gaw, shanhtē hta māra n nga na rē ai: ya chyawm gaw shanhtē a māra lawt na lam, ndang shāra n nga ma sā lu ai.

23 Ngai hpe n dawng ai wa gaw, nyē Wa hpe mung n dawng ai, rai nga ai.

24 Māsha kāga n di lu ai amu, ngai shanhtē hta n di nngai rai taw gaw, shanhtē hta māra n nga na rē ai: ya chyawm gaw shanhtē ngai hte nyē Wa hpe mu da ninglen, an lāhkawng hpe n dawng n yawt rai mā sai.

25 Rai ti mung dai gaw, Māra n nga n̄ga ti mung, shanhtē ngai hpe n dawng n yawt ma ai, nga nna shanhtē a, tāra laika hta ka da ai ga dik wa na mātu, rai nga ai.

26 Nyē Wa kaw nna, nanhtē hpang de ngai shāngun dat ya na ring ngai, Shālan Shābran ai wa nga ai, Wa kaw nna pru sa ai teng man ai ,a Wenyi du jang, shi gaw nyē a lam sakse hkam ya na ra ai.

27 Nanhtē mung, shawng nnan kaw nna ngai hte rau nga ma nit dai mājaw, sakse hkam nga myit dai.

## 16

Nanhtē myit kātaw shāra n nga mā lit ga, ngu nna she, ndai lam ngai nanhtē hpe tsun da mā de ai.

2 Shanhtē gaw tāra jawng ni hta nna, nanhtē hpe shāpraw kau na mā ra ai: gāja wa nan, nanhtē hpe sat kau lu ai wa kādai mung, Kārai Kāsang a māgam hpe gun hpai nngai, nga nna myit la ai aten du wa ra ai.

3 Shanhtē gaw nyē Wa hpe mung, ngai hpe mung n chyē ma ai mājaw, shing di na ma ra ai.

4 Rai ti mung, shanhtē a nhitoi du ai shāloī, ngai nanhtē hpe ning ngu tsun hkap da sai gaw, nanhtē dum lu myit ga, ngu nna ga ndai ngai nanhtē hpe tsun nngai: shawng de gaw ngai nanhtē hte rau naw nga nngai mājaw, ngai nanhtē hpe ning ngu n tsun yu nngai.

5 Ya chyawm gaw, ngai hpe shāngun dat ai wa hpang de ngai wa na ni ai: nanhtē hta na mung, Nang gāde wa na n ta? nga nna ngai hpe kādai n san yu myit dai.

6 Rai ti mung, ndai lam ni ngai nanhtē hpe tsun mā de ai mājaw, nanhtē a myit māsin hta yawn hkyen ai hpring mat mā sā lit dai.

7 Ning nga ti mung, teng man ai lam she ngai nanhtē hpe tsun nngai: ngai wa ai gaw nanhtē a akyu mātu rai nga ai: kāning rai nme law, ngai n wa yang gaw, dai Shālan Shābran ai wa nanhtē kaw du sa na n rai: ngai wa jang chyawm gaw, ngai shi hpe nanhtē hpang de shāngun dat na we ai.

8 Dai wa du jang shi gaw mungkan ga hpe, yubak māra lu ai lam mung, ding hpring lu ai lam mung, tāra jēyang na lam mung, daw dan da na wu ai:

9 Yubak māra lu ai lam daw dan da na gaw, shanhtē ngai hpe n kam n sham ma ai mājaw, rai na rai nga ai:

10 Ding hpring lu ai lam daw dan da na gaw, ngai gaw nyē Wa hpang de wa mat nna, htawm hpang de nanhtē ngai hpe n mu lu na mājaw, rai na rai nga ai;

11 Tāra jēyang ai lam daw dan da na gaw, ndai mungkan ga a Du wa tāra jēyang hkrum sai mājaw, rai na rai nga ai.

12 Ngai nanhtē hpe tsun da na lam law law naw nga ai rai ti mung, nanhtē ya gārai n hkam la lu myit dai.

13 Rai ti mung, dai teng man ai Wenyi du sa jang, shi gaw teng man ai lam yawng māyawng nanhtē hpe mādun na ra ai: dai wa gaw shi a myit hte tsun na ra ai n rai; na la lu ai htē māde tsun dan na rai ai: htawm hpang de byin na ra ai lam mung, shi nanhtē hpe tsun dan na ra ai.

14 Dai wa gaw, ngai lu ai hta na shaw la nna, nanhtē hpe tsun shāna ya na rai nga ai mājaw, nyē a hpung shingkang shāpraw ya na ra ai.

15 Nyē Wa lu mālu gaw ngai lu ai rai nga ai: dai mājaw, ngai lu ai hta na shi shaw la nna, nanhtē hpe tsun shāna ya na rai ai, ngu nna ngai tsun ni ai.

16 Hkring mi rai jang, nanhtē ngai hpe n mu na myit dai; hkring mi bai rai jang, bai mu lu na myit dai, ngu mu ai.

17 Shing nga ai mājaw shi a sāpe ni nkau mi gaw, Hkring mi rai jang, nanhtē ngai hpe n mu na myit dai; hkring mi bai rai jang, bai mu lu na myit dai, nga nna mung, Wa hpang de ngai wa na nngai, nga nna mung, shi anhtē hpe tsun mi ai ga gaw, hpa nga ai ga rē ai i? nga nna shāda da san shājāng ma ai:

18 Bai shanhtē gaw, Hkring mi rai jang, (nga ai ga gaw hpa nga ai ga rai ta? anhte n chye ga ai.

19 Yesu chyawm gaw shanhtē shing nna san māyū nga ai hpe chye da nu ai

rai nna, shanhte hpe tsun mi ai gaw), nanhtē ngai hpe n mu na myit dai, hkring mi bai rai jang bai mu na myit dai, ngu nna ngai tsun ai ga hpe, nanhtē shāda jawm san hkat da mu ni?

20 Ngai nanhtē hpe gāja wa teng teng tsun ma de ga, Nanhte gaw hkrap ngu hkrap ngoi ai hte, shārung shāyawt ai hkrum na ma rin dai; mungkan māsha ni chyawm gaw kābu gāra lu na mā ra ai; nanhtē gaw yawn hkyen ai hkrum na mā rin dai, rai ti mung, nanhtē a yawn hkyen ai gaw kābu gāra ai bai tai na ra ai.

21 Num sha gaw kāsha shāngai na rai yang, shi a shāngai nhtoi gu sai mājaw, yawn hkyen nga ai, rai ti mung, kāsha shāngai ngut jang, ndai dinghta ga ē māsha lāngai mi shāprat tawn nu ai mājaw, kābu gāra nga ai rai nna, shawng na ru tsang ai hpe bai n dum wu ai.

22 Dai hte māren nanhte ya yawn hkyen nga myit dai: rai ti mung, nanhtē hte ngai bai hkrum lu nna, nanhtē a myit māsin kābu gāra na ra ai: dai nanhtē a kābu gāra ai hpe kādai kāshun la ya lu na n rai.

23 Dai nhtoi hta nanhtē ngai hpe hpa mung n san ra na myit dai: ngai nanhtē hpe gāja wa teng teng tsun ma de ga, Wa kaw na lāma ma hpyi myit yang, nyē amying a mārang ē shi nanhtē hpe jaw na ra ai.

24 Ya du hkra nyē a amying hta gang nna, nanhtē hpa mung n hpyi yu myit dai: nanhtē a kābu gāra ai hpring tup wa hkra, lu la na mātu, hpyi nga mu.

25 Ndai lam ni hpe ga shādawn hku hte ngai nanhtē hpe tsun dan mā sā de ai; ga shādawn hku hte n rē ai sha, Wa a lam nanhtē hpe dan dan leng leng tsun dan na ahkying gaw, du na ra ai.

26 Dai nhtoi ē, nanhtē nyē a amying hpe gang nna hpyi na mā rin dai; nantē

a mātu māra nyē Wa kaw ngai hpyi na, n ngu nngai:

27 Kāning rai nme law, nanhtē ngai hpe tsaw ra myit dai rai nna, ngai gaw Wa kaw na pru sa nngai hpe, nanhtē kam sham myit dai mājaw, Wa gaw shi hkum nan nanhtē hpe tsaw ra nga ai.

28 Ngai gaw Wa kaw na pru sa nna, mungkan ga de du sa ni ai; bai mungkan ga hpe ngai kau da nna, Wa hpang de wa na nngai, ngu mu ai.

29 Shāloī shi a sāpe ni gaw, Yu u, ya gaw ga shādawn hku hte n rē ai, dan dan leng leng nang tsun nit dai:

30 Yawng māyawng hpe nang chyē nga ndai mung, gāde ai nang hpe hpa n san ra ai mung, ya anhtē chyē sā ga ai: dai rē ai mājaw nang Kārai Kāsang kaw na du sa ndai gaw, anhtē kam sā ga ai, ngu nna tsun mu ai.

31 Yēsu bai htan wu ai gaw, Nanhtē ya kam ma nit ni?

32 Yu mu, nanhtē bra mat nna, ngai hkrat hpe sha kau da nhtawm, lāngai hte lāngai tinang a shāra de wa mat na ahkying gaw du wa ra ai rai nna, ya pyi du ra ai: rai ti mung ngai gaw, ngai hkrat nga nngai n rai, Wa gaw ngai hte rau rai nga ai.

33 Nanhtē ngai hta ngwi pyaw ai lu la myit ga, ngu nna, ndai ga ngai nanhtē hpe tsun ni ai: nanhtē gaw mungkan ga ē nni nkri hkrum sha myit dai: rai ti mung, dakran dakan rai nga mu; ngai gaw mungkan ga hpe dang kau da ni ai, ngu mu ai.

## 17

Dai lam ni Yēsu tsun nga ninglen, lāmu de māda yu nna, Wa ē, nyē ahkying du sā li ai: ngai nsha wa a lāta de nang ap ya ai yawng māyawng hpe shi htani htana asak jaw nga u ga, hkrung mahkrung a ntsa ē up ai ahkang aya nang shi hpe jaw nit dai hte māren,

2 Ngai nsha wa ē na a hpung shingkang shāpraw ya lu n ga, nsha wa a hpung shingkang hpe mung, shāpraw ya e law.

3 Htani htana asak ngu ai chyawm gaw, lāngai sha rai nga ai hte teng man rē ai nang Kārai Kāsang hpe mung, nang shāngun dat ai wa Yēsu Hkrustu hpe mung, shāntē chyē chyāng lu ai hpe, ngu ai rai nga ai.

4 Ngai gun hpaí na mātu, nang ngai e ap ya ai amu hpe, ngai gun hpaí ngut se ai rai nna, ga ningtsa ē na a hpung shingkang shāpraw da ya se ai.

5 Wa ē, ginding aga gārai n lat kaw nna, nang hte rau ngai lu nga ai hpung shingkang ngu ai, nang hkum hte nan, ya mung ngai hta dan hkung shāngun e law.

6 Mungkan ga na nang ngai e ap ya ai māsha ni hpe na a amying ningsang ngai shādan ya se ai; shāntē gaw na a ni rai ma ai rai nna, nang shāntē hpe ngai e jaw nit dai; shāntē mung na a mung ga hkan shātup ma sai.

7 Nang ngai hpe jaw mājaw yawng, nang kaw na rai nga ai gaw, ya shāntē chyē mā sai:

8 Kāning rai nme law nang ngai e jaw dat ai mung ga hpe, ngai shāntē hpe jaw ma we ai rai nna, shāntē mung dai hpe hkap la ma sai mājaw, nang kaw na ngai pru sa nngai gaw, shāntē gāja wa teng teng chyē ma ai hte, nang ngai hpe shāngun dat ndai mung, kam sham ma ai.

9 Shāntē a mātu māra ngai hpyi nngai: mungkan māsha ni a mātu māra hpyi nngai n rai; nang ngai hpe jaw ai ni a mātu she hpyi nngai; kāning rai nme law, shāntē gaw, na a ni rai nga ma ai:

10 Dai hta kāga, ngai lu mālu gaw na a rai nga ai; nang lu mālu mung, nye a rai nga ai rai nna, nyē a hpung shingkang shāntē hta dan hkung li ai.

11 Ya kaw nna ngai gaw mungkan ga ē n nga nngai, ndai ni chyawm gaw, mungkan ga ē nga nga na rai ma ai: ngai gaw nang hpang de wa na rai nga nngai. Chyoí pra ai Wa ē, an gaw lāngai sha rai nga ga ai zawn, ndai ni mung rai nga mu ga, nang ngai e jaw ai ni hpe, na a mying ningsang hta shāgrin shāngang da u.

12 Ngai shāntē hte rau nga nga ai hte yang, nang ngai e jaw ai ni hpe, na a amying ningsang hta ngai shāgrin shāngang da nna, shāntē hpe mākawp māga ma se ai: shāntē hta na hten bya ai a kāsha hta kāga gaw, lāngai mi muk n hten n bya ma ai: dai wa a hten bya ai chyawm gaw, Chyum laika hta rawng ai ga dik wa na mātu rai nga ai.

13 Ya gaw nang hpang de ngai wa na rai nna, nyē a kābu gāra ai gaw shāntē hkum hta nan hpring tup wa mālu ga, ngu nna mungkan ga ē, ga ndai ngai tsun da nga nngai.

14 Na a mung ga ngai shāntē hpe jaw da mā se ai: ngai gaw mungkan ga na n rai nngai hte māren, ndai ni mung mungkan ga na n rai ma ai mājaw, mungkan māsha ni shāntē hpe n dawng nga ma ai.

15 Ndai ni hpe mungkan ga na htawt la na, ngai hpyi nngai n rai, n shawp n kap ai hta na shāntē hpe mākawp māga na she, ngai hpyi nngai.

16 Ngai gaw mungkan ga na n rai nngai hte māren, ndai ni mung mungkan ga na n rai ma ai.

17 Na a teng man ai lam hta, shāntē hpe shāchyoí shāpra ya mu; na a mung ga gaw, teng man ai lam rai nga lit dai.

18 Nang ngai hpe mungkan ga de shāngun dat ndai zawn, ngai mung shāntē hpe mungkan ga de shāngun dat da mā we ai.

19 Shāntē hkum nan, teng man ai lam hta chyoí pra nga mu ga, ngu nna

ngai gaw shanhtē a mātu māra, nyē hkum dai shāchyoī shāpra tawn se ai.

20 Ndai ni a mātu sha ngai hpyi nngai n rai; shanhtē tsun dan ai ga a mājaw, ngai hpe kam sham ai ni a mātu mung, ngai hpyi nga nngai:

21 Nang ngai hpe shāngun dat ndai gaw, mungkan ga na ni kam sham lu mu ga, dai ni nlang htē gaw lāngai sha tai nna, Wa e, nang ngai hta nga nna, ngai mung nang hta nga nna nngai zawn, dai ni nlang htē gaw, an hta nga nna, ngai hpyi nga nngai.

22 An gaw lāngai sha rai nga ga ai zawn, ngai gaw shanhtē hta nga nna, nang mung ngai hta nga nna ai a mārang e, shanhtē lāngai sha tai wa nna, lāngai sha hta hkum tsup wa lu na mātu mung,

23 Nang ngai hpe shāngun dat ndai hte nang ngai hpe tsaw ra ndai zawn, shanhtē hpe mung tsaw ra nga ndai gaw, mungkan māsha ni chyē lu na mātu mung, nang ngai e jaw ai hpung shingkang hpe, ngai shanhtē hpe jaw da mā se ai.

24 Wa ē, ginding aga gārai n lat kaw nna, nang ngai hpe tsaw ra nga ndai mājaw, nang ngai e jaw ai hpung shingkang hpe, ngai hpe jaw da ai ni mung māda mu lu mu ga, ngai nga ai shāra ē shanhtē ngai hte rau nga lu na hpe, ngai ra nga nngai.

25 Ding hpring ai Wa ē, mungkan ga na ni nang hpe n chye ma ti mung, ngai chyē nga nngai: nang ngai hpe shāngun dat ndai gaw, ndai ni mung chyē nga ma ai.

26 Nang ngai e tsaw ra ai n gaw n wai myit gaw, shanhtē hta a nga nna u ga mung, ngai shanhtē hta a nga nna na mātu mung, na a mying ningsang hpe ngai shanhtē e shāchyē shāchyang mā se ai rai nna, a shāchyē shāchyang nga na nngai law, nga ai.

## 18

**Y**ēsu gaw dai ga tsun ngut jang, shi a sāpe ni hte rau pru wa nna, Kedron hkāraw wora hkran de rap sa ma ai: dai yang ē sun nga a i rai nna, shi gaw sāpe ni hte dai de shang wa ma ai.

2 Yēsu gaw shi a sāpe ni hte law law lang dai de a sa ga nga a i mājaw, shi hpe ap kau na wa Yuda mung, dai shāra hpe chyē da wu ai.

3 Dai rai nna Yuda gaw, hpyen lāngā mi hte, Hkinjawng agyi ni hte Hparishe ni kaw na, hpyen bu ni hpe lu la jang, pyengdin, shānan, ri nhtu hte rai nna, dai de sa wa ma ai.

4 Yēsu gaw, shi hta byin wa ra ai lam yawng hpe chyē wu ai mājaw sit sa nna, Nanhtē kādai hpe tam myit ta? ngu nna shanhtē hpe san mu ai.

5 Shanhtē gaw, Nazaret na Yēsu hpe tam ga ai, nga nna shi hpe htan ma ai. Yēsu gaw, Ngai nan rai nga nngai, ngu nna shanhtē hpe tsun mu ai. Shi hpe ap kau na wa Yuda mung dai ni hte rau tsap nga ai.

6 Dai rai nna shi gaw, Ngai nan rai nga nngai, ngu wu yang, dai ni gaw hpang de kānut wa nna, ga hta kādawng taw mat ma ai.

7 Bai shi gaw, Kādai hpe tam myit ta? ngu nna shanhtē hpe bai san mu yang, shanhtē gaw, Nazaret na Yēsu hpe tam ga ai, nga nna bai htan ma ai.

8 Yēsu gaw, Ngai nan rai nga nngai, ngu nna nanhtē hpe ngai tsun ma sā de ai: ngai hpe tam ai rai myit yang gaw, ndai ni gaw wa mā nu ga, ngu nna htan wu ai.

9 Dai gaw, Nang ngai e jaw ai ni hta na, lāngai mi hpe muk ngai n shāyet kau nngai, ngai nna shawng de shi tsun ai ga dik wa na mātu, rai nga ai.

10 Simun Petru gaw nhtu hpye nga ai rai nna, dai hpe shaw nhtawm, hkinjawng agyi wa a māyam hpe kāhtam

nna, dai wa a hkra māga na ana di mat Lu ai: dai māyam a amying gaw Mal-hku ngu ai rai lu ai.

11 Dai rē ai mājaw Yēsu gaw, Na a nhtu dai hpe n-ga hta shawn bang kau u: nyē Wa ngai e jaw ai gawm hpe ngai n lu na rai ni? ngu nna Petru hpe tsun wu ai.

12 Shāloī hpyen ma ni, hpyen bu wa hte, Yuda māsha ni a agyi ni gaw, Yēsu hpe rim la nna gyit ngut jang, Anna hpang de shawng woi wa mu ai:

13 Kāning rai nme law, shi gaw dai shāning ē hkinjawng agyi tai ai, Kayapa a kātsa wa rai nga ai.

14 Dai Kayapa gaw, Amyu māsha ni a mātu māsha lāngai mi si yang grau mai ai, ngai nna Yuda ni hpe hpaji daw ya ai wa rai nga ai.

15 Shāloī Simun Petru hte kāga sāpe langai mi gaw, Yēsu kaw hkan nang ma ai. Dai kāga sāpe wa gaw, hkinjawng agyi hte chyē chyap ai rai nna, hkinjawng agyi wa a nta npan de, Yēsu hte rau hkan shang nang ai:

16 Petru chyawm gaw shinggan māga chyenghka lam mākau ē hti tsap nga ai. Dai mājaw hkinjawng agyi wa hte chye chyap ai sāpe kāga gaw pru nna, chyenghka sin ai num hpe tsun nhtawm, Petru hpe shāshawn la wu ai.

17 Shāloī chyenghka sin ai num gaw, Nang mung dai wa a sāpe ni hta na lāngai mi rai n ni? ngu nna Petru hpe san wu ai. Shi gaw, n rai nngai, ngu nna htan wu ai.

18 Dai shāloī kāshung ai mājaw, māyam ni hte agyi ni gaw, nra hte wan wut nna, wan kra let tsap nga ma ai: Petru mung dai ni hte rau tsap nna, wan kra nang nga ai.

19 Shāloī hkinjawng agyi wa gaw Yēsu hpe, shi a sāpe ni a lam hte shi shārin shāga ai lam, san wu ai.

20 Yēsu gaw, Ga ningtsa ē ngai dan dan leng leng hkaw tsun ni ai: Yuda

māsha nlang zap hpawng ai Tāra jawng ni hta mung, naw ku Htingnu hta mung ngai tut tut shārin shāga ni ai: mākoi māgap nna ngai hpa mung n hkaw n tsun nngai.

21 Nang ngai e hpa rai san n ta? Ngai kāning ngu hkaw tsun nngai gaw, na la ai ni hpe san yu u; ngai tsun ai ga hpe shanhtē chyē ma ai, ngu nna htan wu ai.

22 Shing ngu wu yang mākau ē tsap nga ai agyi lāngai mi gaw Yēsu hpe kāhpret nna, Hkinjawng agyi wa mi ting hpe, nang shing nga htan lu n ni? ngu wu ai.

23 Yēsu gaw, Ngai tsun ai ga n kāja yang gaw, n kāja ai ngu nna sakse hkam u; ga kāja she ngai tsun ai rai yang me, nang hpa rai ngai hpe kāhpret n ta? ngu nna htan wu ai.

24 Dai rai nna Anna gaw, gyit da nga ai ta, shi hpe hkinjawng agyi Kayapa hpang de sa bang shāngun dat wu ai.

25 Simun Petru chyawm gaw wan kра let tsap nga ai. Shāloī shanhtē gaw, Nang mung shi a sāpe ni hta na rai n ni? ngu nna shi hpe sun mu ai. Shi gaw, N rai nngai, ngu nna nyet kau wu ai.

26 Petru ē kāhtam nna, na di ai wa hte hpu nau daw ai, hkinjawng agyi a māyam lāngai mi mung, Nang sun ē dai wa hte rau nga ndai hpe, ngai mu nngai n rai ni: ngu wu ai.

27 Dai mājaw Petru bai nyet kau wu ai: dai shāloī jang u goi ra ai.

28 Bai shanhtē gaw Yēsu hpe, Kayapa kaw nna Pretori Htingnu de sa bang mu ai: dai ten gaw jāhpawt mānap jau ē rai nga ai; shanhtē gaw awu asin rē ai n hkrum ai sha, dai Shālai wa poi sha lu na mātu, timang dai Htingnu nhku de n shang ma ai.

29 Dai rē ai mājaw Pilat gaw shanhtē nga ai de pru nna, Ndai wa hta narhtē hpa māra shāgun mu ta? ngu nna san wu ai.

30 Shāloī shanhtē gaw Ndai wa, n kāja ai amu gālāw ai wa n rai yang gaw, anhtē nang kaw sa bang na ga ai n rai, ngu nna htan mu ai.

31 Dai rē ai mājaw Pilat gaw, Nanhtē dai shi hpe la nna nanhtē a tāra hte māren jēyang mu, ngu nna shanhtē hpe htan wu ai. Yuda māsha ni, Anhtē gaw kādai hpe sat na ahkang mung n lu ga ai, ngu nna bai htan mu ai.

32 Shanhtē shing nga ai gaw, Yēsu shi kāning rē ai lam hte si hkam lu na, nga nna kumla jaw let, tsun da ai ga dik wa na mātu, rai nga ai.

33 Dai mājaw Pilat gaw Htingnu kāta de bai shang nna, Yēsu hpe shāga la nhtawm, Nang Yuda māsha ni a hkawkam rai nga n ni? ngu nna shi hpe san wu ai.

34 Yēsu gaw, Dai gaw na a myit hte nang san n ni? shing n rai, māsha kāga ē nyē a lam nang hpe tsun dan ma ni? ngu nna htan wu ai.

35 Pilat gaw, Ngai Yuda māsha rai nga a ni? Na a amyu māsha ni hte hkinjawng agyi ni gaw, nang hpe ngai kaw sa ap nga ma ai; nang hpa gālaw shut nit ta? ngu nna htan wu ai.

36 Yēsu gaw, Nyē a mungdan gaw ndai mungkan ga na n rai li ai; nyē a mungdan ndai mungkan ga na rē ai rai yang gaw, ngai Yuda māsha ni a lāta de n shang hkra, nyē a ali ama ni gāsat na ma sai: ya chyawm gaw nyē a mungdan ndai yang na n rai li ai, ngu nna htan wu ai.

37 Dai rē ai mājaw Pilat gaw, Rai taw, nang hkawkam teng nga n ni? ngu nna san wu ai. Yēsu gaw, Nang tsun ai hte māren ngai Hkawkam teng nga nngai: dai ngu nna teng man ai a māga de sakse hkam na mātu, ngai shāngai jinghkai wa ni ai hte, mungkan ga de du sa ring ngai: teng man ai hte seng ai ni nlang htē gaw, nyē a ga nsen mādat ma ai, ngu nna htan wu ai.

38 Pilat gaw, Teng man ngu ai gaw hpa rai ta? ngu nna shi hpe tsun wu ai. Shing nga nhtawm Yuda māsha ni kaw shi bai pru nna, Ndai wa hta hpa māra mung ngai n mu nngai.

39 Rai ti mung, Shālai wa poi ē māsha lāngai mi ngai nanhtē hpe dat ya ga ai htung, nanhtē hta nga ai hte māren, Yuda māsha ni a Hkawkam wa hpe nanhtē e dat ya na, nanhtē ra myit ni? ngu nna san wu ai.

40 Shāloī shanhtē gaw, Dai wa hpe n rai, Baraba hpe dat ya mi, nga nna bai jāhtau tsun ma ai: Baraba chyawm gaw dāmya rai nga ai.

## 19

Dai rē ai mājaw Pilat gaw Yēsu hpe gang la nna kāyat wu ai.

2 Hpyen māsha ni mung ju hpun hte kāgup hkri la nhtawm, shi a baw hta shāgup ya nna, pālawng ahkyeng mung shi hpe jāhpun mu ai:

3 Shing di nhtawm, shi hpan de shanhtē sit sa nna, Yuda ni a Hkawkam ē, nang a lu nit ga law, nga nna tsun let shi hpe kāhpret ma ai.

4 Shāloī Pilat gaw shinggan de bai pru nna, shanhtē hpe, yu mu, ndai wa hta hpa māra mung ngai n mu nngai gaw, nanhtē chyē lu myit ga, ngu nna ngai shi hpe nanhtē hpan de shāpraw dan mā de ai, ngu wu ai.

5 Yēsu mung, ju kāgup gup ai hte pālawng ahkyeng hpun let pru wa ai. Shāloī Pilat gaw, Ndai māsha wa hpe yu mu! ngu nna shanhtē hpe tsun mu ai.

6 Dai mājaw hkinjawng agyi ni hte du agyi ni gaw shi hpe mu jang, Wudang hta jen da u, jen da u, nga nna jāhtau ma ai. Shāloī Pilat gaw, Nanhtē nan shi hpe la nna jen da mu; ngai gaw shi hta hpa māra mung n mu nngai, ngu nna shanhtē hpe tsun mu ai.

7 Shāloī Yuda māsha ni gaw, Anhtē mung tāra lu ga ai; ndai wa gaw shi hkum hpe Kārai Kāsang a Kāsha hpyi hpun ai a mājaw, dai tāra hte māren si ging nga ai, ngu nna shi hpe htan mu ai.

8 Pilat gaw dai ga na ai mājaw grau hkrit nga ai rai nna,

9 Htingnu nhku de bai shang nhtawm, Yēsu hpe, Nang kānang na rai n ta? ngu nna san wu ai. Yēsu chyawm gaw ga hkaw mi muk n htan wu ai.

10 Dai mājaw Pilat gaw, Nang ngai hte ga n tsun hkrav n ni? Ngai nang hpe dat dat lu ai ahkang hte, wudang hta jen da lu ai ahkang lu nngai, nang n chyē n ni ngu nna shi hpe tsun wu ai.

11 Yēsu gaw, Nang hpe ningtsa de nna, ahkang jaw da sai n rai taw gaw, nyē a ntsa ē hpa ahkang mung, nang n lu na ndai : dai mājaw ngai hpe nang kaw sa ap ya ai wa gaw; yubak grau kāba lu ai, ngu nna, shi hpe htan wu ai.

12 Shing nga ai mājaw Pilat gaw Yēsu hpe dat dat na lam tam nga ai : Yuda māsha ni māhtang, Nang dai wa hpe dat dat n yang gaw, nang Kehta hkawkam a jinghku n rai nit dai: tinang dai tinang hkum hpe hkawkam shātai la ai wa gaw, Kehta hkawkam hte nhtan shai ai wa rai nga ai, nga nna jāhtau ma ai.

13 Pilat gaw dai ga na jang, Yesu hpe woi shāpraw nhtawm, Hebre ga hte Gabahta ngu ai Nlung nep ai shāra ē tāra tingyang hta dung nga ai.

14 Ya, Shālai wa poi a mātu shāchyip ai nhtoi rai nga ai hte, hkying kru dāram mung rai sai. Shāloī Pilat gaw Yuda māsha ni hpe, Nanhtē a hkawkam wa hpe yu yu mu, ngu mu ai.

15 Dai rē ai mājaw shanhtē gaw, La kau u, la kau u, wudang hta jen da kau u! nga nna jāhtau ma ai. Bai Pilat gaw, Nanhtē a

Hkawkam wa hpe wudang hta ngai jen da na rai ni? ngu nna shanhtē hpe san wu ai. Shāloī hkinjawng agyi ni gaw, Kehta hkawkam hta kāga, anhtē hkawkam n lu ga ai, ngu nna htan mu ai.

16 Dai rē ai mājaw Yēsu hpe wudang hta jen da kau mu ga nga, shanhtē a lāta de ap ya kau wu ai.

17 Dai rai nna shanhtē gaw Yēsu hpe woi dun wa mu ai. Yēsu gaw shi a wudang shi dai hpa nna, Pungkum ngu ai shāra de pru sa wa ai; dai shāra hpe Hebre ga hte Golgohta nga ma ai.

18 Shanhtē gaw dai yang ē shi hpe wudang hta jen da ma ai; shi hte rau mārai lāhkawng hpe mung, māga mi de lāngai ngai di jen da mu ai rai nna, Yēsu gaw dai yan a lāpran ē rai nga ai.

19 Pilat mung māsat dingsat laika ka la nna wudang hta shākap da wu ai. Dai ka ai gaw, Yuda ni a Hkawkam Nazaret wa Yēsu, nga ai rai lu ai.

20 Yēsu hpe jen da ai shāra gaw mare hte mung ni nga ai hte, dai laika hpe Hebre ga, Latin ga, Heleni ga hte ka da nga ai mājaw, Yuda māsha law law wa dai māsat dingsat laika hpe hti ma ai.

21 Shing nga ka da ai mājaw, Yuda māsha ni a hkinjawng agyi ni gaw, Pilat hpe, Yuda ni a Hkawkam nga nna hkum ka, Ngai gaw Yuda māsha ni a Hkawkam rai nngai, nga nna shi tsun ai, ngu nna she ka u, ngu nna sa tsun mu ai.

22 Pilat gaw, Ngai ka ai hku ngai ka da se ai, ngu nna htan mu ai.

23 Hpyen māsha ni gaw Yēsu hpe jen da ngut jang, shi a hpun pālawng hpe la nna, māli brang di ga kāran nhtawm, hpyen māsha lāngai mi ē daw daw la mu ai: dai kāta pālawng hpe mung shing di na maw mu ai: rai ti mung, kāta pālawng gaw shākung n rawng ai, lawng du nna htum hkra da ai rai nga ai.

24 Dai mājaw shanhtē gaw, Pālawng ndai hpe anhtē n gang je ai sha, kādā māhtang la ang na gaw hpaida da ga, nga nna shāda da tsun ma ai; dai gaw, Shanhtē nyē a hpun nba hpe shāda kāran la nna, Nye a kāta pālawng hpe mung hpaida da ma ai, nga nna laika hta rawng ai ga dik wa na mātu rai nga ai.

25 Dai mājaw hpyen māsha ni shing rai gālaw ma ai. Ya Yēsu a wudang mākau ē shi a kānu hte, kānu a nau na Klop a mādu jan Mari hte, Magdala Mari htē tsap nga ma ai.

26 Dai mājaw Yēsu gaw kānu hte shi tsaw ra ai sāpe, mākau ē tsap nga ma ai hpe, mu wu yang, kānu hpe, Numsha ē, ning sha hpe yu u, ngu wu ai.

27 Dai sāpe hpe mung, Ning nu hpe yu u, ngu wu ai. Dai shāni kaw nna dai sāpe gaw, Yēsu a kānu hpe shi a nta ē woi tawn dā wu ai.

28 Dai hpang Yēsu gaw amu mahkra ngut sai hpe chyē wu jang, Ngai hpang kāra nngai, nga nna laika shādik na mātu tsun wu ai.

29 Dai yang ē ntsin hkri hte hpring nga ai di bu lāngai mi dung nga ai: dai mājaw shanhtē gaw hka kāmu hta ntsin hkri jāhpring la nhtawm, majaw ndung hta shākap nna, shi a n-gup hta gawn ya mu ai.

30 Yēsu gaw dai ntsin hkri hkrap lu ngut jang, Ngut ma sā li ai, nga nhtawm, baw nga di nna, nsa jāhti kau wu ai.

31 Dai shāni gaw shāchyip ai nhtoi rai nga ai hte, hpang shāni mung Lāban nhtoi kāba rai nga ai mājaw, lāban nhtoi ē wudang hta mang n noi nga u ga, Yuda māsha ni gaw dai ni a lāgaw kāyat daw nna, dai mang ni hpe htawm kau na, Pilat kaw ahkang hpyi ma ai.

32 Dai mājaw hpyen māsha ni sa nna, shi hte rau jen da ai yan a lāgaw hpe kāyat daw ya mu ai:

33 Yēsu kaw du yang, shi si mat boi sai hpe shanhtē mu ma ai mājaw, shi a lāgaw hpe gaw n daw ya mu ai:

34 Rai ti mung hpyen māsha lāngai mi gaw, shi a gārep hpe ri hte gālun waw ya wu ai rai nna, shāloi jang, sai hte ntsin pru wa ai.

35 Dai lam mu ai wa gaw sakse hkam wu ai rai nna, shi a sakse gaw teng man lu ai: nanhtē mung kam sham lu myit ga, teng man ai ga shi tsun nga ai gaw, shi dai chyē nga ai.

36 Kāning rai nme law, dai lam byin ai gaw, Shi a nra lāngai mi muk daw na n rai, nga ai laika ga dik wa na mātu rai nga ai.

37 Bai laika lāngai mi hta, Shanhtē gālun waw ai wa hpe shanhtē mu lu na ma ru ai, nga ai.

38 Dai hpang, Yuda māsha ni hpe hkrit ai mājaw, māyun de nna Yēsu a sāpe tai nga ai, Aramahti mare na Yosep ngu ai wa gaw, Yēsu a hkum tsawp hpe shāyu la na, Pilat kaw ahkang hpyi wu ai; Pilat mung ahkang jaw dat wu ai: dai rē ai mājaw shi sa nna dai hkum tsawp shāyu la wu ai.

39 Shawng de shāna ē shi kaw sa chyai ai, Nikodi mung sa ai rai nna, mura hte achyaw kāyau ai mānam pyaw ai baw, joi sumshi dang la sa ai.

40 Shāloi shan gaw Yēsu a hkum tsawp hpe la nhtawm, Yuda māsha ni a mākoi mayang ai hking hte māren, mānam pyaw ai baw hte sumpān ē kāyawp ahkyen mu ai.

41 Shi hpe jen da kau ai shāra e sun lāngai mi nga ai: dai sun ē māsha lāngai mi hpe muk gārai n mākoi yu ai lup ningnan lāngai mi nga ai.

42 Yuda māsha ni a shāchyip ai nhtoi rai nga ai hte, lup dai mung ni nga ai mājaw, shan gaw Yēsu hpe dai yang ē tawn da mu ai.

## 20

**H** pang na nhtoi bat shawng shāni, Hnhtoi gārai n htoi yang, Magdala Mari gaw jau jau e lup de sa wa ai rai nna, lup chyinghka la ai nlung sit mat nga ai hpe, mu wu ai.

2 Dai mājaw shi gaw Simun Petru yan Yēsu tsaw ra ai sāpe hpang de gat wa nhtawm, Dai Mādu hpe lup de na shanhtē la mat wa nna, kānang tawn da mu ai mung, anhtē n chyē ga ai, ngu nna shan hpe tsun mu ai.

3 Dai mājaw Petru yan kāga sāpe gaw, pru nna lup de sa wa ma ai.

4 Shan rau gat sa wa ma yang, dai kāga sāpe gaw Petru hpe gat lai kau da nna, lup de shawng sa du ai:

5 Shāloi shi gum yu wu yang, sumpan gin-yan taw nga ai sha mu wu ai; rai ti mung, shi gaw kāta de n shang ai.

6 Simun Petru chyawm gaw shi a hpang ē hkan gat nang nna, dai de du jang, kāta de shang yu wu ai:

7 Sumpān gin-yan taw nga ai mung, baw na hpajet gaw sumpan hte rau n rē ai, kāga ga rai nna kātsu taw nga ai mung, shi mu wu ai.

8 Dai mājaw lup de shawng du ai, dai kāga sāpe mung hkan shang wa nna, mu lu ai hte kam sham wu ai.

9 Kāning rai nme law, Yēsu gaw si ai ni kaw na bai hkprung rawt na ra ai, nga nna rawng ai Chyum laika hpe, shan gārai n chyē ma ai.

10 Shāloi dai sāpe yan gaw nta de bai wa ma ai.

11 Mari chyawm gaw, dai lup shin-ggan ē hkrap let tsap nga ai: shing rai hkrap let shi gum nna, lup kāta de yu yu di wu ai;

12 Shāloi hpraw tu ai hpun pālawng bu hpun ai lāmu kāsa lāhkawng gaw, Yēsu a moi mang tawn ai shāra a baw ngu na de lāngai mi, lāgaw ngu na de lāngai mi, dung nga ai hpe mu wu ai.

13 Dai yan gaw, Numsha ē, hpa rai hkrap nga n ta? ngu nna san mu ai: shi gaw Nyē Mādu hpe la mat wa nna, kānang tawn da ma ai mung, n chyē nngai mājaw rai nngai, ngu nna shan hpe htan mu ai.

14 Shing nga nhtawm, shingdu de shi kāyin wa ai rai nna, Yēsu tsap nga ai hpe mu wu ai; rai ti mung, dai wa Yēsu rai nga ai gaw, shi n chyē wu ai.

15 Yēsu mung, Numsha ē, hpa rai hkrap nga n ta? nang kādai hpe tam n ta? ngu nna shi hpe san wu ai: shi chyawm gaw, dai wa hpe sun sin ai wa rai daw ai nga, myit nna, Tsa e, nang shi hpe hpai la kau ndai rai yang gaw, kānang tawn da ai, ngai hpe tsun dan e, ngai la wa na nngai, ngu nna shi hpe tsun wu ai.

16 Shāloi Yēsu gaw, Mari ē, ngu nna shāga wu ai. Shi mung kāyin let, Raboni, ngu nna Hebre ga hte htan wu ai: dai gaw, Sara nga ai, rai nga ai.

17 Bai Yēsu gaw, Ngai e hkum hkra ēt; kāning rai nme law, ngai Wa hpang de ngai gārai n lung wa nngai: rai ti mung, ngai nau ni hpang de wā nna, Ngai gaw nyē a Wa hte nanhtē a Kāwa, nyē a Kārai Kāsang hte nanhtē a Kārai Kāsang hpang de lung wa sā na da, ngu nna shanhtē hpe wa tsun dan su, ngu nna shi hpe tsun dat wu ai.

18 Shāloi Magdala Mari gaw wa nna, Dai Mādu hpe ngai mu lu se ai, nga nna mung, shi ngai hpe shing nga htet dat ai, nga nna mung, tsun dan wu ai.

19 Dai rē ai mājaw, dai nhtoi bat shawng shāni na nnsin rim ē, Yuda māsha ni hpe hkrit ma ai mājaw, sāpe ni nga ai nta ē chyininghka ni la kau ma sā yang, Yēsu sa du nna shanhtē a kāang e tsap let, Nanhtē ngwi pyaw nga myit ga, ngu nna shanhtē hpe tsun wu ai.

20 Shing nga ngut jang, shi shanhtē hpe shi a lāta hte gārep mādun wu ai.

Säpe ni mung dai Mädu hpe mu lu yang, käbu gära nga ma ai.

21 Bai Yësu gaw, Nanhtë ngwi pyaw nga myit ga; nyē Wa ngai hpe shängun dat nngai hte mären, ngai mung nanhtë hpe shängun dat mä de ai, ngu nna shanhtë hpe tsun mu ai.

22 Shing nga nhtawm, säpe ni a ntsa ē shi käwut nna, Chyoi pra ai Wenyi hkap la mu:

23 Gäde a yubak mära hpe rai ti mung, nanhtë raw dat myit yang gaw, raw mat na ra ai; gäde a yubak mära hpe rai ti mung, nanhtë shägun da myit yang gaw, mära nga na ra ai, ngu nna shanhtë hpe tsun wu ai.

24 Shing rai Yësu sa du ai shälo, säpe shi lähkawng hta lawm ai Didumu ngu ai Htawma gaw shanhtë hte rau n nga ang ni.

25 Dai rai nna käga säpe ni shi hpe, Anhtë gaw Mädu hpe mu lu sä ga ai, ngu nna tsun dan mu ai. Shälo Htawma gaw, Shi a lätta hta hpri hkang ngai n mu, dai hpri hkang hta nyē a läyung hte nan ngai n shawn yu, shi a gärep hta nyē a lätta n mänaw yu lu yang gaw, ngai n kam nngai, ngu nna shanhtë hpe tsun wu ai.

26 Dai hpang mätsat ya rai jang, säpe ni gaw nhku ē bai rawng nga ma ai rai nna, Htawma mung shanhtë hte rau rai nga ai. Chyinghka la da nga yang, Yësu sa du nna shanhtë a käang ē tsap let, Nanhtë ngwi pyaw nga myit ga law, ngu wu ai.

27 Shälo shi gaw Htawma hpe, Na a läyung nang de lädawn nna, nyē a lätta hpe yu u; na a lätta lädawn nna, nyē a gärep hpe mung mänaw yu u; n kam hkum rai ēt, kam sham nga u, ngu wu ai.

28 Dai rai nna Htawma gaw, Nyē a Mädu, nyē a Kärai Känsang rai nga ndai, ngu nna shi hpe htan wu ai.

29 Yësu gaw, Nang gaw ngai e mu lu ai mäjaw sha kam n ni? n mu ti mung, kam sham ai ni gaw a lu ma ai, ngu nna shi hpe tsun wu ai.

30 Laika ndai hta n ka da ai lämik kumla käga law law mung, Yësu gaw shi a säpe ni a man ē gälaw dan nu ai:

31 Rai ti mung, Yësu gaw, Kärai Känsang a Käsha ngu ai, Hkristu rai nga ai hpe, nanhtë kam sham lu nna, shi mying ningsang a märang ē asak hkrung ai lu la myit ga, nga nna ndai htë wa ka tawn nga ai.

## 21

Dai hpang Yësu gaw Tiberi nawng mäkau ē, säpe ni hpe shi hkum bai mädun dan mu ai; dai shälo ni mädun dan ai lam gaw, ning rai nga ai:

2 Simun Petru hte Didumu ngu ai Htawma, Galile mung Hkana kähtawng na Nahtanela, Zebedi a käsha yan, käga säpe lähkawng, dai htë rau nga ma ai.

3 Shälo Simun Petru gaw, Ngai nga sa hkan ni ga, ngu nna shanhtë hpe tsun wu ai. Shanhtë gaw, Anhtë mung hkan sa na ga ai, nga ma ai. Shälo shanhtë pru sa nna li hta shang ma ai: dai shäna shanhtë gaw längai mi muk n lu ma ai.

4 Nhtoi htoi wa yang, Yësu gaw nawng hkin-gau ntsa ē tsap nga ai: rai ti mung säpe ni gaw, Yësu rē ai, n chye mu ai.

5 Dai mäjaw Yësu gaw shanhtë hpe, Ngai sha ni e, nanhtë shahpa läma ma lu myit ni? ngu nna san wu ai; shanhtë gaw, N lu ga ai, ngu nna shi hpe htan mu ai.

6 Shälo shi gaw, Dai li a hkra mäga de sumgawn jähkrat mu, shälo lu na myit dai, ngu nna shanhtë hpe tsun mu ai. Dai hte mären shanhtë jähkrat nna, nga law law wa mägawn la lu ai mäjaw, sumgawn pyi n gang lu mu ai.

7 Dai rai nna Yësu a tsaw ra ai säpe gaw, Mädu she rai nga ai, ngu nna Petru hpe tsun wu ai. Mädu rē ai nga ai hpe Simun Petru na jang, shi sing-gu krin rai nga ai mäjaw, ntsa päläwng hta läbu nna, nawng de gan shang wa ai.

8 Käga säpe ni chyawm gaw, hkgau hte mänga shi lam sha gang nga ai mäjaw, nga hte hpring chyat rē ai sumgawn kärawt let, li käji hte du wa ma ai.

9 Shanhtë gaw hkärang ntsa de du wa ma yang, nra wan mang hta, nga käkang da ai hte, muk tawn da ai hpe, mu mu ai.

10 Shälo Yësu gaw, Ya nanhtë lu la ai nga hta na la wa ma rit, ngu wu ai.

11 Dai mäjaw Simun Petru lung nna, nga käba lätsa ē mänga shi mäsum ting rawng ai sumgawn hpe hkärang ntsa de kärawt shälu wu ai: dai hte wa law ti mung, sumgawn gaw n je lu ai.

12 Shälo Yësu gaw, Wa mä rit, jähpawt shat wa sha ma ru, ngu nna shanhtë hpe tsun mu ai. Shi Mädu rai nga ai hpe säpe ni chyē ma ai mäjaw, shanhtë hta na kädai mung, Nang kädai rai n ta? ngu nna n san wam mu ai.

13 Yësu gaw dai muk la nna säpe ni hpe sa jaw mu ai; nga hpe mung dai hte mären sa jaw mu ai.

14 Yësu shi si ai ni kaw na bai hkrung rawt ai hpang, säpe ni hpe shi a hkum mädun dan ai hta na, ndai gaw mäsum lang na rai nga ai.

15 Ya shanhtë jähpawt shat sha ngut jang, Yësu gaw Simun Petru hpe, Yaw han a käsha Simun ē, ndai ni tsaw ra ai hta, nang ngai hpe grau tsaw ra n ni? ngu nna san wu ai. Shi gaw, Rai sa, Mädu ē, ngäi nang hpe tsaw ra nga nngai gaw, nang chyē nga ndai, ngu nna htan wu ai. Shälo Yësu gaw, Nyē a sägu käsha ni hpe bau nga u, ngu nna shi hpe tsun wu ai.

16 Bai lähkawng lang, Yawhan a käsha Simun e, nang ngai hpe tsaw ra nga n ni? ngu nna shi hpe san wu ai Shi gaw, Rai sa, Mädu ē, ngai nang hpe tsaw ra nga nngai gaw, nang chyē nga ndai, ngu nna bai htan wu ai. Yësu gaw, Nyē a sägu ni hpe rem nga u, ngu wu ai.

17 Bai mäsum lang, Yawhan a käsha Simun ē, nang ngai hpe tsaw ra nga n ni? ngu nna san wu ai. Mäsum lang du hkra, Nang ngai hpe tsaw ra nga n ni? nga nna shi hpe san wu ai mäjaw Petru myit yawn nna, Mädu e, nang gaw yawng mäyawng hpe chyē nga ndai; ngai nang hpe tsaw ra nga nngai gaw, näng chye nga ndai, ngu nna, htan wu ai. Yësu gaw, Nyē a sägu ni hpe bau nga u.

18 Nang hpe ngai gäja wa teng teng tsun de ga, Nang shäbrang nga ai htë yang, na a hkum hpe nang dai shingkyit kyit nna, sa mayu ai shära shägu de sa lu ndai: rai ti mung, nang dingla jang chyawm gaw, na a lätta yan hpe nang lälam nna, mäsha käga gaw nang hpe kyit ya nhtawm, nang n ra ai shära de woi sa wa na rin dai, ngu nna shi hpe tsun wu ai.

19 Shing nga tsun ai gaw, Petru gaw käning rē ai si lam hte Kärai Känsang a hpung shingkang shäpraw lu na hpe, tau nna tsun ai rai nga ai. Ga dai tsun ngut jang, Yësu gaw Petru hpe, Ngai kaw hkan nang rit, ngu wu ai.

20 Shälo Petru käyin yu wu yang, Yësu tsaw ra ai säpe ngu ai, shawng de shäna shat sha nga ai shälo, Yësu a sinda hta shämyet nna, Mädu ē, nang hpe ap kau na wa gaw kädai mähtang räi ta? nga nna san ai säpe hkan nang nga ai hpe, mu wu ai.

21 Petru gaw dai wa hpe mu jang Yësu hpe, Mädu ē, rai taw, ndai wa gaw käning rai na ra ta? ngu nna san wu ai.

## **YAWHAN A LAIKA**

22 Yēsu gaw, Ngai du sa ai nhtoi du hkra, ngai shi hpe nga nga shāngun māyu nngai, dai nang hte hpa seng a ta ? nang gaw nye hpang hkan nang rit, ngu nna htan wu ai.

23 Ga dai mājaw, dai sāpe gaw si na n rai, nga nna hpu nau ni hta tsun shājang ma ai: rai ti mung, dai sāpe hpe n si na rē ai, nga nna Yēsu tsun ai n rai; Ngai du sa ai nhtoi du hkra, ngai shi hpe nga nga shāngun māyu nngai, dai nang hte

hpā seng a ta? nga nna tsun ai sha, rai nga ai.

24 Dai sāpe wa gaw ndai lam ni hpe sakse hkam nna, ndai lam ni ka da ai wa rai nga ai: shi a sakse teng man nga ai gaw, anhtē chyē ga ai.

25 Yēsu gālaw ai amu kāga law law wa naw nga ai; dai amu ni a lam shāgu hpe hkan ka da yang, dai ka da ai laika ni gaw mungkan ga hta pyi n shang na rē ai, ngu nna ngai myit nngai law.